



[Катихисис (малый)]

Собрание краткия науки, о артикулах веры.

Сиречь о догматах, или о преданиях веры, православно кафолическия, христианския. артикул бо, по словенску предание или сложение толкуется: по исповеданию и учению, святыя восточныя соборныя апостольския церкви, ради учения и ведения всем православным христианом. наипачеже детям учащимся, по повелению государя царя и великаго князя Алексея Михайловича всея Руси самодержьца: и по благословению великаго господина святейшаго Иосифа патриарха Московскаго и всея Руси; тиснением издася языком словенским, в царьствующем граде Москве. в лето семь тысящ 157-е. месяца, генваря, в 20 день.

А сия напечатася во всем согласно с вышепомянутой книжицы Катихисиса, первым тиснением, в христианской типографии, при Преображенском богаделенном дому, в Москве. в лето 7418.

Символ, рекше исповедание, преосвященнаго Афанасия патриарха Александрийскаго.

Иже хочет спастися, прежде всех подобает ему держати кафолическую веру. еяже аще кто целы и непорочны не соблюдает, кроме всякаго недоумения, вовеки погибнет. Вера же кафолическая сия есть, да единаго Бога в Троице, и Троицу во единице почитаем, ниже сливающе составы, ниже существо разделяюще. Ин бо есть состав Отец, ин Сыновнее и Святаго Духа. но Отчее и Сыновнее и Святаго Духа, едино есть Божество, равна слава, соприисносущно величество. яков Отец, таков Сын, таков и Святыи Дух. не создан Отец, не создан Сын, не создан и Святыи Дух. непостижим Отец, непостижим Сын, непостижим Дух Святыи. Вечен Отец, вечен Отец, вечен Сын, вечен и Святыи Дух. обаче не три вечны, но един вечныи. якоже не три непостижимии, ниже три несозданнии, но един несозданнии, и един непостижимии. Подобне, вседержитель Отец, вседержитель Сын, вседержитель и Дух Святыи. обаче не три вседержители, но един вседержитель. Тако, Бог Отец, Бог Сын, Бог и Дух Святыи. обаче не три бози, но един Бог. равне, Господь Отец, Господь Сын, Господь и Дух Святыи. обаче не три господие, но един есть Господь. зане якоже особно койждо состав Бога и Господа исповедати, христианскою истинною понуждаемся, тако три боги, или три господоы, глаголати, кафолическим благочестием възбраняемся. Отец ни от кого есть сотворен, ни создан, ниже рожден. Сын от Отца самого есть, не сотворен, ни создан, но рожден. Дух Святыи ни рожден ни создан, но исходящъ. един убо есть Отец, не три отцы. един Сын, не три сыны. един Дух Святыи, не три дуси святии. И в сей Святей Троице ничтоже первое, или последнее, ничтоже более, или менее, но целы три составы соприисносущны суть себе и равны. Сице яко да по всему, якоже предречеса, Троица во единице, и единица в Троице почитается. хотяи убо спастися, тако о Святей Троице да мудрствует. **О Христе.** Но нужно есть, к вечному спасению, да и о воплощении Господа нашего Исуса Христа известно веровати. есть же правая вера, да веруем и исповедуем, яко Господь наш Исус Христос Сын Божии, Бог и человек есть; Бог от существа Отца прежде век рожденнии. и человек есть от существа матерня во времени рожденнии. совершенныи Бог, и совершенныи человек, от души словесныя и человеческия плоти состояи. равен Отцу по

Божеству, мнии Отца по человечеству. Иже убо аще и Бог есть человек, обаче не два, но един есть Христос. един же не пременением божества в плоть, но восприятием человечества в божество. един всяко, не слиянием естеств, но единством состава. якоже бо душа словесная и плоть, един есть человек, тако Бог и человек, един есть Христос, пострадавший спасения нашего ради, и сошедший во ад, и в третий день воскресший из мертвых, и возшедший на небеса, и седый одесную Бога и Отца Вседержителя, отонудуже приидет судити живым и мертвым. Егоже пришествием вси человецы воскреснут с телесы своими, и воздадут о своих делах ответ. и убо благая соделавшии пойдут в жизнь вечную, злая же во огонь вечный. Сия есть католическая вера, еяже аще кто верно и известно верити не будет, спастися не возможет.

**Анастасия блаженнаго патриарха Великия Антиохии. и Кирила
Александрийскаго, изложение вкратце о вере.
и вопросы и ответы о богословии.**

Вопрос. Коя веры еси? **Ответ.** Христианин есмь.

Вопрос. Что есть христианин? **Ответ.** Иже в Бозе живет, и благочестивно, и благолюбезне пребывает.

Вопрос. О богословии колико естеств исповедуеши? **Ответ.** Едино естество исповедую.

Вопрос. Кое? **Ответ.** Божество.

Вопрос. Что есть Бог? **Ответ.** Бог есть существо неповинно, и вина всяческим, сиречь, всемогущ, и всякия вины и естества преестественен.

Вопрос. Почему познавается Отец от Сына? **Ответ.** По составех, понеже есть Отец нерожден.

Вопрос. Почему познавается, Сын от Отца? **Ответ.** По составех, понеже есть Сын рожден.

Вопрос. Почему познавается Дух Святыи от Отца и Сына? **Ответ.** По составех, понеже есть исходящ.

Вопрос. Како веруеши? **Ответ.** Верую во единого Бога Отца, и единого рожьшагося от Него Бога Сына, и во един Дух Святыи от Отца исходяща Бога.

Вопрос. Что есть существо? **Ответ.** Существо есть вещь самобытна, не требующая иного к своему составлению.

Вопрос. О божестве колико составов исповедуеши? **Ответ.** Три составы исповедую, Отца и Сына и Святаго Духа.

Вопрос. Что есть состав? **Ответ.** Силу единосущну образует, естества Отчаго. лица же глаголем о Бозе безплотна, и невоображена.

Вопрос. Что есть особливо всякому от трех состав, и что обще? **Ответ.** Особно убо есть, Отцу, нерождение. Сыну же, рождение. а Духу Святому, исходяние. обще же им божество и царство.

[О Христе] **Вопрос.** О промышленности воплощения Христова, колико естеств исповедуеши? **Ответ.** Два естества исповедую, едино божества, и едино человечества.

Вопрос. Что есть воля божественная? **Ответ.** Воля божественная есть, еже очищати прокаженных. якоже показати хотя Христос волю и действие божественное, рече прокаженному, хошу, очистишься.

Вопрос. Что есть действие Божие? **Ответ.** Действие Божие есть, еже спастися всем человеком, и на введение истины приити.

Вопрос. Что есть воля человека? **Ответ.** Воля человека есть, еже просити да испиет, якоже на кресте.

Вопрос. Что есть действие человеческое? **Ответ.** Действие человеческое есть, иже путь шествовати, утрудитися. и прочая таковая.

Вопрос. Колико составов о воплощении исповедуеши? **Ответ.** Един состав исповедую, яко той един Сын Божии, и Сын Девы.

Вопрос. Почему причастник есть Сын Отцу и Святому Духу? **Ответ.** Причастник им есть по естеству божественному, понеже есть совершен Бог.

Вопрос. Почему причастник есть человеком? **Ответ.** По естеству вочеловечения своего, понеже и человек совершен есть.

Вопрос. Чесо ради Сын воплотися, а не Отец, или Дух? **Ответ.** Яко да сохранит свойство ипостаси своея, яко быти тому на небесех Сыну и на земли Сыну, аминь.

**Святаго Максима изложение о вере вкратце вопрошати и отвечавати
всякому христианину православному.**

Вопрос. Колико естеств исповедуеши о Святей и единосущней и неразделимой Троице? **Ответ.** Едино естество исповедую.

Вопрос. Колико существа? **Ответ.** Едино существо.

Вопрос. Колико образов? **Ответ.** Един образ.

Вопрос. Колико волей, рекше хотений? **Ответ.** Едину волю.

Вопрос. Колико составов, рекше лиц. **Ответ.** Три составы исповедую, Отца и Сына и Святаго Духа.

Вопрос. Кто от Святыя Троицы воплотися? **Ответ.** Сын Слово.

Вопрос. Колико естеств исповедуеши о Сыне Божии вочеловечьемся нас ради? **Ответ.** Два естества исповедую, божество и человечество.

Вопрос. Колико существ? **Ответ.** Два существа исповедую. едино, единосущно Отцу по божеству. и второе, единосущно матери по человечеству.

Вопрос. Колико волей, рекше хотений? **Ответ.** Две воли исповедую, божества, и человечества.

Вопрос. Колико действий? **Ответ.** Два действия исповедую.

Вопрос. Колико составов? **Ответ.** Един состав, Бога Слова.

Вопрос. Колико рождеств? **Ответ.** Два рождества исповедую, первое превечное, безлетное, безплотное. восия бо от Отца, яко от солнца свет. второе напоследок от святыя Девы Богородицы Марии родися Бог Великий, превечный, собезначальный, невидимый, непостижимый, неописанный по Божеству, не обименный, съведый сердца всем человеком. Святая Богородица роди един состав, во двою познаваемъ естеству. по божеству бо от Отца рождество безлетно, напоследок же в лето от нея воплощься, плотию раждаемъ. Аще же и вопрошающии назнаменуют нам, рождеися от святыя Богородицы, во двою ли естеству сыи? Речем им, ей, во дву естеству есть, Бог бо есть, Той же и человек. Также и о распятии, и о воскресении, и о вознесении, естества сияют, а не составы. Пострада убо Христос во двою естеству сыи, странным естеством распяться. плотию бо на кресте висия, а не божеством. Аще же паки рекут нам вопрошающии, два ли естества умроста? Речем им, ни, не буди то. ибо ни два естества распята быста, но родися Христос, иже есть Бог Слово вочеловечися и родися. плотию распята, плотию пострада, плотию умре. без страсти убо пребывшу Божеству Его.

Вопрос. Колико естеств висия на кресте? **Ответ.** Исус во двою естеству сыи, странным естеством висияше на кресте, плотию а не божеством. се изложение сведый, истинный израильтянин есть, в нем же льсти несть. Аще же паки хочещи познати, что есть Бог? и како поклонятися Ему? слыши и внимай, и разумей, и увеси истинно, Отца и Сына и Святаго Духа: един свят, едино хотение, и едина воля, и едина премудрость, и едина сила. не убо ов прежде век, ов же по вещех, но купно Отец и Сын и Святыи Дух. Сын во Отце, Дух в Сыне. совокуплено бысть естество, и едино божество. Разделяетжеся по составех на трое, во единстве же паки есть, по существенному слову. сего ради и Отца глаголюще, и Сына славяще, и Духа исповедующе, Бога именуем, Имже Божие естество обще есть, Отцу и Сыну и Святому Духу. а еже рещи, Отец и Сын и Святыи Дух, не суть общая имена, но особно коемуждо составу. Отец бо не нарицается Сын. и Сын не нарицается Отец, и Дух Святыи ни Отец ни Сын нарицается. глаголю же три составы, сиречь три лица, един образ. Не глаголем в трех лицах, три существа, или три естества, или три боги, якоже треклятаго Ария ученицы: но единаго Бога. едино существо, и едино естество, в трех составех исповедуем. Не глаголем един состав, якоже проклятии савелиане, но три составы, и три лица во едином образе, и во едином божестве. исповедуем и молим и почитаем.

Книга Катихисис

рекше учение о вере, и нужнейших винах пристоящих к ней.

Вопрос. Много ли есть вещей потребных, на спасение христианину православно кафолическому? **Ответ.** Две вещи суть [Злат. Бес. 3]: Первое добре веровати в Господа Бога, единого во Святей Троице и всему тому яже Христос во евангелии научи. Второе, благочестно по вере жити, якоже писание святое учит [Ияков, гл. 2]: видите, яко от дел оправдается человек, а не от веры токмо. И ниже: зане якоже тело без духа мертво есть, тако и вера без дел мертва есть. И инде [Злат. Бес. 3, 1 Тим. глава 1: имея веру, и благу совесть: юже неции отринувше от веры отпадоша. И на ином месте: имея таинство веры в чисте совести.

Вопрос. Научи мя чесо ради первое имам добре веровати, и потом от веры жительствовати благочестно. **Ответ.** Для того, яко кроме веры невозможно есть угодити Богу, якоже святыи апостол Павел глаголет [евреом глава 11], веровати же подобает приходящим к Богу, яко есть, и взыскающим Его мздовоздатель бывает.

Вопрос. Где имам научитися вере, и доброму жительству христианскому? **Ответ.** Во святом писании, и предании апостольском такоже и во святей соборней церкви, яже на соборех святыми отцы, совершенными и истинными догматами преданными. но занеже трудно есть всякому хотящему познавати веру христианскую, дабы о ней могл абие познати, сего ради в малых зде убо собраниях, или изображениях ко удобству познания предложися.

Вопрос. Много ли есть частей собрания науки? **Ответ.** Три. В первой о изложениях веры: В другой, о надежи: В третьей о любви, к Богу и к ближнему.

Часть первая о вере.

Вопрос. Что есть вера? **Ответ.** Вера есть, якоже глаголет божественныи апостол Павел [евреом, глава 11]: уповаемым извещение, вещем невидимым обличение: или сице [Злат. евреом, гл. 11, Бес. 32]: вера есть крепкое и твердое разумение со дерзновением в сердце о Бозе, и о вещех спасеных, ихже невидимо сердцем видим и усты исповедуем, по реченному [рим., глава 10]: сердцем убо веруется в правду, усты же исповедуется во спасение.

Вопрос. Много ли есть сложений веры? **Ответ.** По исповеданию веры христианския на дву вселенских соборех, первом Никейском, и втором Константинопольском сложенному, дванадесять есть артикулов веры православно христианския [собор никейс. и кон.; Афан. в тол. веры].

Вопрос. Которыи есть первыи [артикул] сложения веры? **Ответ.** Верую во единого Бога, Отца вседержителя, творца небу и земли, видимым же всем и невидимым.

Вопрос. Колико в себе сей артикул имать вещей? и чесому от него научаемся? **Ответ.** Три [Афан. в слове против ариан; и во исповедании тоже]: первое, како имам веровати и исповедовати, яко Бог един есть в существе своем. в трех же составех якоже се, Отец, Сын, и Дух Святыи. три убо составы един же Бог, якоже Христос во евангелии учит [Матф. 28]. шедше научите вся языки, крестяще их во имя Отца и Сына и Святаго Духа. к сему научает яко mezi тремя божественными собствы, первою особою и началом конца не имущим, источником же и коренем, и виною есть Отец, Сыну рождением, и Духу Святому происхождением.

Вопрос. Чесо второму научает сей артикул? **Ответ.** Научает, яко Бог един сый присно, ни начала ни конца имея, благости своя ради творец есть всем видимым же и невидимым [Дамаск. книга 2 глава 2], яко же писание святое учит [Деяния глава 4]: Владыко Ты Боже сотворивый небо и землю и море и вся яже в них. и инде [колас. глава 1]: яко Онем создана быша всяческая, яже на небеси и яже на земли, видимая и невидимая, аще престолы, аще господствия, аще начала, аще власти, всяческая Тем и Онем создашася.

Вопрос. Чего третьяго сей артикул научает? **Ответ.** Научает [Дамаск. книга 2 глава 2], яко все вещи сотвореныя, яже и последнейшия суть, сам Бог назирает и соблюдает силою

своею, по реченному [псалом 144], очи всех на Тя уповают, и Ты даеши им пищу во благо время, отверзаеши Ты руку Твою, и насыщаеши всяко животное благоволения.

Вопрос. Чего имам боле научиться о Бозе от того сложения? **Ответ.** Имаши познати, яко в Бозе два суть свойства, едино убо существа есть, еже убо обще имать быти всем трем составом, якоже Богу Отцу, и Сыну, тако и Святому Духу, егда един Бог в Троице глаголется. другое свойство есть составное, и не общее, но коемуждо составу особно. якоже Отцу Сына родити, и Духа Святаго испущати: Сыну убо рождену быти от Отца прежде всех век от существа Его, такоже и Духу Святому от Тогоже Отца исходити.

Вопрос. Кое разньство есть между свойству состав и существа? **Ответ.** Свойство существа знаменует [Дамаск. книга 1, глава 9], единого Бога быти, единого естества, и существа, славы же, и престола, и величества. свойство же паки составное знаменует во едином божестве трех лиц разделение и несмущение: яко единого состава, свойство другому составу придатися не может.

Вопрос. О сотворении паки како имам разумети? **Ответ.** Всякое сотворение от Бога в своем естестве, совершенно и зело добре сотворено есть, по реченному [Быт. 1]: и виде Бог вся елика сотвори, и се добра зело.

Вопрос. Что Господь Бог первое сотворил? **Ответ.** По писанному Моисеом [Быт. глава 1]; в сотворении сего видимаго мира, первое небо и землю сотворил: на концы же всего иного сотворения, человека от земли, вдохнув в него дух животен, по образу своему и по подобию сотворил.

Вопрос. Преже видимаго сего мира сотворил ли что Господь Бог? **Ответ.** О сем научают святии отцы, святыя восточныя церкве [Злат. о проувед. достод. книга 1; Дамаск. книга 2 глава 12; Григор. Богос. в слове о неп.], яко преже сего видимаго мира, невидимии ангелове сотворени суть. человек же о дву существ составися, видимаго, и невидимаго. по видимому имать тело, а по невидимому имать душу.

Вопрос. Како имам разумети о ангелех? **Ответ.** Ангелове суть дуси разумнии [Дамаск. книга 2 глава 3], самовластнии жители, небеснии слуги Господа Вседержителя, по реченному [псалом 103]: творяи ангелы своя духи, и слуги своя огонь палящ.

Вопрос. На много ли чинов делятся ангели? **Ответ.** Девять есть чинов ангельских: престолы, херувими, серафими, начала, власти, силы, господствия, архангели, и ангели.

Вопрос. Кая служения ангельская пред Богом? **Ответ.** Первое [Дионис. о небесном священонач. глава 7], Первое, Господа Бога непрестанно славити и служити Ему, по воли и по повелению Его святому. потом людем избранным Божиим ко спасению ходатайми быти, по реченному [евреем глава 1] не вси ли суть служебнии дуси в служение посылаеми за хотящих наследовати спасение, такоже возвещают волю Божию, и благодейства Его чаловеком, якоже благовестил ангел Пресвятей Деве. и рожество Христово пастырем в полунощи возвестили [Лука 1 и 2].

Вопрос. Како имам разумети яко ангели служат нам? **Ответ.** Защищают нас от неприятеля душевнаго, и от всякого зла. якоже писание святое учит [Деян. глава 5], ангел Господень нощию отверзе двери темници. изведе же их рече, идите, и ставше глаголите в церкви людем вся глаголы жизни сея. и на ином месте [глава 12]: и Петр быв в себе рече, ныне вем воистину яко посла Бог ангела своего и изят мя из руки Иродовы, и всего чаяния людей иудейских. молитвы же, и милостыни, и иная благочестивая дела наша пред престол Божии приносят, якоже писание святое свидетельствует [Товии 12]. когда молился еси с плачем, и погребал еси мертвыя, и оставльши обед свой, скрывал еси умершыя в день в дому твоём. нощию же погребал еси я, аз принесох молитву Господу Богу.

Вопрос. Всякий ли человек имать ангела стража си? **Ответ.** Всякий верный имеет, по глаголющему во евангелии [Матф. 18; Дамаск. книга 2 глава 3; Дионис. о небесном священонач. глава 9; Феофил. на Матф. глава 18; Злат. Бес. о непос.]: блюдите, да не презрите единого от малых сих: глаголю бо вам, яко ангели их на небесех выну видят лице Отца Моего небеснаго. и не точию человеци имут, но и грады, страны, и царства. такоже и монастыри и церкви имут ангелов особных хранителей себе.

Вопрос. Како или чим ангелов хранителей себе получаем? **Ответ.** Молитвою непрестанною, еже молити их о ходадайте к Господу Богу, наипаче же ангела хранителя своего, дабы молитвы наши пред престол Божии принося, ходатайствовал о нас, и сам бы был помощником, на всякого врага, паче же на невидимаго.

Вопрос. Чим ангела хранителя от себе отгоняем? **Ответ.** Грехами, наипаче же смертными [Злат. Матф. глава 4 бес. 5]: тем аще и случится кому от немощи человеческия впасти в грех, наипаче же смертныи, не отлагати то, но вскоре исповеданием и покаянием очищати себе потреба, дабы ангел хранитель пакися к нам обратил, и не попускал врагу невидимому в болшия грехи нас вводити.

Вопрос. Ангели вси ли святы и блази? **Ответ.** Ангели вси святы и блази от Господа Бога сотворени суть, но отступник с своими ему единомыслеными, волею своею отступи от Бога, и сотвори себе злым и лжею, по глаголющему Христом [Иоан. 18]: он човекоубийца бе искони, и во истине не стоит, яко несть истины в нем. егда глаголет лжу, от своих глаголет, яко ложь есть, и отец лжи. За что и с неба свержен бысть; и вместо ангела учини себе сатаню и прелестником человеческим.

Вопрос. Может ли диавол человека к греху приневолити? **Ответ.** Диавол сын, первыи враг человеку, всегда его искушает, и к греху приводит всякими образы по писанному [1 Пет. глава 5; Дамаск. книга глава 4]: трезвитесь бодрствуйте, зане сопостат ваш диавол яко лев рыкая ходит искии кого поглотити, но нудити не может.

Вопрос. Како имам разумети о человеце? **Ответ.** Человек от Господа Бога сотворен есть [Вас. ст.], по образу Его и по подобию, якоже и преже о том научихом, преже греха бе в достоинстве безгрешия [в стане невинности], не ведая что злаго, егда же преступи заповедь Божию, тогда достоинство безгрешия в стан греха, и целость человека в немощь бысть.

Вопрос. Кое разньство есть между достоинством, безгрешия и греха? **Ответ.** Достоинство безгрешия [Дамаск. книга 2 глава 1], имать в себе по благодати безсмертие и нетление. достоинство греха, принесе с собою смерть же и тление по реченному, воньже убо день аще снете от древа, смертию умрете.

Вопрос. В достоинстве греха како человек бе? **Ответ.** В смерти, и в тлении, и во всяких страстех, и в клятве, обаче не без надежи, егда к змии Господь Бог глаголал [Быт. 3]: вражду убо положю посреде тебе, и посреде жены, и посреде семенем твоим, и посреде тоя. той тебе блюдет главу, и ты блюдеши ему пяту. и сия надежа и обещание Божие, даже до пришествия Мессии глаголаннаго, патриархи и пророки утешала человеческий род. егда же Мессиа желаемый, рекше Исус Христос прииде по обещанию, и род человеческий кровию своею от работы вражия искупи, клятву возьм, безсмертие же в животе вечном даровал, якоже о том ниже научим.

Вопрос. Ведал ли Бог о Адаме яко имать согрешити? **Ответ.** Не точию о Адаме, но и о диаволе и о всех сотворениях знал и ведал [Дамаск. книга 2 глава 4]: глаголю же о ангелех и о человецех, яже имут мыслити, глаголати, и творити: обаче сотвори се на обновление болшаго благодаяния своего. в человеце паки и се ведал, яко не токмо благодаяние Божие болшее искуплением Его имать показатися, но яко в естестве своем и в составе Сына Божия. и имать сести одесную престола Божия [евреем глава 1]: и ангели имут пред Ним поклоняться, яко пред Господем своим: имже ни злоба диавольская ниже грех человеческий в мире к тому владети и пакоствовати можаше.

Вопрос. Всякое ли сотворение сам Бог надзирает? **Ответ.** Аще о сем и выше поведася, яко вся вещь Бог, обаче к тому да скажется и истиннее: вся убо вещь Господь Бог, яко и малыя вещи в деснице своей имать, и оными заведает, якоже сам во евангелии учит [Матф. глава 10; Злат. о проуведении книга 1]: не две ли птице ценитесь единому ассарию, и не едина от нею падет на земли без Отца вашего, вам же и власи главнии вси изочтени суть.

Вопрос. Что же имея Господь Бог человека в дозоре своем, попусти ему в грех впасти? **Ответ.** Время еже в раи назнаменованное было на искус человека, еже есть даною заповедию, еяже не содержа в себе, не сын еще благодатию утвержен, но оставлен в воли своей, по реченному [Сирах 15], в начале сотвори Бог человека, и остави его в руке

изволения его, рек, аще хочещи, соблюдеши заповеди, и веру сотвориши благоволения. предложил ти есть огонь и воду, и на неже хочещи, прострещи руку твоею. пред человеком живот и смерть. и еже аще изволит, дастся ему, но не отдав подобающаго послушания и веры, по поущению Божию впаде в грех преступления, на указание больших благодеей Божиих.

Вопрос. Кии промысл Божии о человеце в достоинстве греха? **Ответ.** Яко николиже милостивый Бог от промысла своего человека оставляет, но всегда ему дает вину ко благому [Дамаск. книга 3 глава 3. и книга 2 глава 9 и 27]: не отводя же его от самовластия се творя, но усердствуя помогает ему благодатию своею: благодать же глаголю и яже ныне даную благодать Исус Христом.

Вопрос. Чего имам более научиться от того артикула? **Ответ.** Яже любо лучшаго, и изряднейшаго умом своим объяти можещи, то все Господу Богу, яко сущему благодателю написуй [Дамаск. книга 1 глава 12. Иаков пос. глава 1. Дион. о божествен. имен. глава 1]. о сотворении же паки разумевай, яко яже аще в себе благо имать, то все от Господа Бога. а яже аще зло, то от себе: глаголю же от человек и ангел злых.

Вопрос. Который есть вторый артикул веры? **Ответ.** И во единого Господа Исуса Христа Сына Божия, едиnorodнаго, от Отца рожденаго прежде всех век. света от света, Бога истинна, от Бога истинна, рождена а несотворена, единосущна Отцу, имже вся быша.

Вопрос. Многим ли вешем научает сей артикул? **Ответ.** Двум [Афан. в симв.; Дамаск. книга 1 глава 6 и 9]: первое яко Слово превечное Исус Христос от Бога Отца рожден, а не сотворен есть, и прежде век сии вкупе со Отцем, единого существа и естества, и единыя славы, престола же и величества. Бог истинный, от Бога истиннаго, свет несотворен, от света несотворена.

Вопрос. Чесому научает другому сей артикул? **Ответ.** Научает сему: яко тем словом превечным весь мир видимый же и невидимый сотворен есть, якоже писание святое учит [Иоан. 1]: в мире бе, и мир тем бысть, и мир Его не позна. и инде [евреем глава 1]: Егоже положи наследника всем, Имже и веки сотвори.

Вопрос. Та два имена Исус Христос что знаменуют? **Ответ.** Исус имя аще прежде сего жидове и обще употребляху: но егда Слово превечное, едиnorodный Сын Божии, восприем на ся человеческое естество, тогда сие имя Исус ангелом Гавриилом от Бога с небес принесено есть, еже знаменует Спасителя [Афан., в слове 3, на ариан]: якоже Матфей евангелист написует [Матф. глава 1]: родит же сына, и наречещи имя ему Исус, Той бо спасет люди своя от грех их, и от того времени сие имя бысть особое и избранное: в нем же человеческое спасение показуется, по реченному [Деян. глава 4]: несть о ином ни о едином же спасения: несть бо иного имени под небесем даннаго в человецех, о нем же подобает спастися нам. и сие имя сицевая есть чести, яко и ангел, человеци, и диаволи нань уповати и кланяться имут, по писанному апостолом Павлом [филип. глава 2]: и дарова Ему имя, еже паче всякаго имени: да о имени Исусове всяко колена поклонится, небесных и земных, и преисподних.

Вопрос. В какове чести от нас имать быти имя Исус? **Ответ.** Первое воспоминати е со всякою честью и со страхом благочестно с помышлением безгрешнаго страдания Христова, к сему с воздыханием и с молением, яко да ради Его, и волнаго страдания своего, грехи наша отпустит, и милостив нам будет ныне и вовемя смерти, и в день праведнаго суда Его [Дамаск. книга 1].

Вопрос. Христос что толкуется? **Ответ.** Христос толкуется помазанец [Дамаск. в слове на рожество Богородицы]: якоже в ветхом законе на три чины елеом помазовахуся: на священство, на царство, и на пророчество. тако и Христос Исус помазанец Божии: Егоже по человечеству не елеом, но Духом Святым Бог Отец помаза на тыя три чины, по пророчеству Исаину, и во евангелии глаголющему [Исаия, 61; Лук. 4]: Дух Господень на Мне, Егоже ради помаза Мя, благовестити нищим посла Мя, исцелити сокрушенныя сердцем, проповедати плененым отпущение, и слепым прозрение: отпустити сокрушенныя во отраду. и в сем свидетелстве все три чины Христовы изображены суть, и на Нем се исполнися: якоже и сам о себе глаголет, тамже ниже: яко днесъ събысться писание се во ушию вашею.

Вопрос. Научи мя о тех трех чинех Христовых. **Ответ.** Христос есть первее священником, по чину Мелхиседекову, якоже глаголет о Нем апостол, наречен есть от Бога первосвященник, по чину Мелхиседекову [евреем глава 5]: нарицаетжеся священник того ради: яко самого себе на жертву принесе [Злат. в слове 8 о риз. священ. книга 5]. первее во образех хлеба и вина за очищение наше. потом егда кровь свою излиа якоже той же апостол глаголет [евреем глава 9], аще бо кровь козлия и телчая, и пепел юнции кропящий оскверненыя освящает к плотней чистоте, колми паче кровь Христова, иже Духом Святым себе принесе непорочна Богу, не очистит ли совесть нашу от мертвых дел, воеже служити нам Богу живу и истинну. Царем же вечным называет Его ангел благовествуя [Лука глава 1]: и даст ему Господь Бог престол Давыда отца Его, и воцарится в дому Иаковли вовеки, и царствию Его не будет конца: якоже и титла яже на кресте Его свидетельствует, Исус назарянин, царь иудейский [Иоан. глава 19]. а яже паки приуподобляется пророческому чину, то все яже что любо проповедаше и чесому научаше, чин пророческий быти сказуется.

Вопрос. Чесо ради едиnorodным Сыном Божиим нарицается? **Ответ.** Двоих ради вин [Злат. о непостиж., бес. 1; Иоан. глава 1]: первое разньства ради от Сыновни ипостаси Духа Святаго, яже от Бога же и Отца прозябает, но не образом рождения, но исхождения. едиnorodным же нарицается разньства ради и от сынов иже токмо по благодати именуемии, якоже вернии, и избранныи Богу. по естеству убо сам точию един Исус Христос едиnorodным Сыном Божиим нарицается, яко от существа и от Отца состава прежде всех век безначално рожден есть [Дамаск. книга 4, глава 8].

Вопрос. Который есть третии артикул веры? **Ответ.** Нас деля человек, и нашего ради спасения сошедшаго с небес, и воплотившагося от Духа Свята, и Марии Девы вочеловечьшася.

Вопрос. Многим ли вешем научает сей артикул? **Ответ.** Четырем: первее, яко Сын Божии превечный спасения ради человеческого, благоволением Бога Отца, и Духа Святаго, сниде на землю [Дамаск. книга 3 глава 1, и 2; Афан. в слове о вочеловеч.]. сниде же не от места в место, понеже по божеству везде сии, и вся исполняя, но смилив себе, и бысть человек: якоже святый апостол Павел глаголет [фил. глава 2]: иже во образе Божии сии не восхищением непщевав быти равен Богу. но себе умалил, зрак раба прием, в подобии человечестем быв, и образом обретеса якоже человек, смирил себе, послушлив быв даже до смерти. не пременив божества в человечество, ниже человечества в божество: но бе Бог сии истинен, восприят на ся совершенное человечество: и бысть вкупе Бог и человек, во едином составе божества, во обою существу свойства цела сохранив [Вас. Вел. о естестве челов. в Христе быт. глава 5; Дамаск. книга 3 глава 3]: и сице истинныи есть Бог, и истинныи человек, якоже о сем явственнo научает, и святый апостол Павел [Тим. глава 3]: воистину велия есть благочестиа тайна, Бог явися в плоти.

Вопрос. Чесому второму научает сей артикул? **Ответ.** Научает, яко Христос с собою человечества с небесе не принесе, но действием Духа Святаго восприят от пречистыя Девы Марии вовремя архангельскаго благовещения, идеже егда и отвеща рекущи [Лука глава 1]: се раба Господня, буди мне по глаголу твоему: и с словом архангеловым во утробе пречистыя Девы, совершенное божество Сына Божия, со истинным овершенным человечеством зачатся [Дамаск. книга 3, глава 2]: иже по божеству прежде век от Бога Отца рожден есть: а иже по человечеству от матери под леты, совершен с телом и душою человек.

Вопрос. Чесого третияго научает сей артикул? **Ответ.** Яко зачатие Сына Божия во утробе Девы по человечеству, действием Святаго Духа бысть якоже сказует ангел егда глаголет к Деве [Лука глава 1]: Дух Святыи найдет на тя и сила Вышняго осенит тя: темже и рождаемое свято, наречется Сын Божии. такоже и на ином месте пишет [Матф. глава 1]: се ангел Господень во сне явися ему глаголя, Иосифе сыне Давыдов, не убойся прияти Марию жену твою: рождшеебося в ней от Духа есть Свята. тем пречистая Дева Мария, якоже прежде зачатия, и в зачатии, и по зачатии девою бысть: тако и прежде рожества, и в рожестве, и по рожестве паки девою бысть, и пречистою Богородицею [Дамаск. книга 3, глава 3].

Вопрос. Чесому четвертому научает сей артикул? **Ответ.** Научает о пречистой Деве: яко яже прежде век избранная, и предзнаменованная сущи от родов, мати Сына Божия, боголепотною честью от нас величаема и прославляема быти имать.

Вопрос. Како пречистую Деву чтити, и величати и прославляти имам? **Ответ.** Аще и много образов есть почитания избранных Божиих святых, обаче о пречистой Деве тако потреба разумевати якоже святая восточная соборная и апостольская церковь научает. яко Богородицу Деву почитати и возвышати достоин, не токмо паче всех святых, но и над вся ангельския чины, над херувимы, и серафимы [Дамаск. в слове на рож. и успен. Богородици]. и по Господе Бозе, первую, достойною честью разумевати, по словесех тоя самыя святыя Богородицы, во святом евангелии лежащих [Лука глава 1], се бо отныне блажат мя вси роди: при том и на всякий день множицею должны есмы, якоже в молитвах своих, тако и кроме молитв будучи исправляти архангельское целование или благовещение сие глаголюще сице: Богородице Дево радуися обрадованная Мария Господь с тобою, благословена ты в женах, и благословен плод чрева твоего: яко родила еси Христа Спаса и Избавителя душам нашим.

Вопрос. Како имам разумети о сем поздравлении? **Ответ.** Первое имаши ведати о сем тако, яко сие поздравление, не человеческий смысл состави, но от Господа Бога с небес архангелом Гавриилом принесено есть [Лука глава 1]. зане же николиже бы ангел потщася сам собою, благовестити Деве, аще не бы имел заповеданного о сем от Господа Бога. другая же словеса разумети имаши, святыя Елисаветы, яже иногда исполнь сущи Духа Свята, и пророчествующи рекла, к сей же Деве и Богородице: якоже свидетельствует о сем Лука евангелист, некоторая же паки к сему якоже святая церковь приложи от достоинства своего [3 собор Ефес.].

Вопрос. Что за учение есть в сем поздравлении? **Ответ.** Первое в сем поздравлении, воспоминается воплощение Бога Слова. потом егда коли глаголется сие поздравление, тогда от сего осуждаются вси еретици, не исповедующии Господа Христа воистину воплощшася от пречистой Девы. также осуждаются и несториане, не нарицающии Девы пречистой Богородицею. в сем же воспоминающе и поздравляюще сию пречистую Богородицу, многажды приобретаем ю молитвенницу о нас, к Сыну своему и Богу нашему, яко да избавит нас от грех наших, вкупе же и враг видимых и невидимых, имже егда и при акафистах, и молебнах множицею должны есмы сие поздравление глаголати, дабы нас она омофором своим покрывши защитила от всякаго зла.

Вопрос. Который есть четвертый артикул? **Ответ.** Распятого за ны при Понтийстем Пилате, и страдавша и погребена.

Вопрос. Многим ли вешем научаемся в сем артикуле? **Ответ.** Шестим: первое, якоже воистину человечество Христос Бог от пречистой Девы прият, тако воистину в том человечестве претерпе и умре, идеже и евангелие свидетельствует о нем тако: и возглаголаш гласом велиим Исус рече, Отче в руке Твои предаю дух Мой: и сия рек издше.

Вопрос. Чесому второму научаемся от сего артикула? **Ответ.** Яко Христос Господь безгрешен сии, яко овча избавления ради грех наших пострада и умре, и кровь свою честную излия: якоже и святыи апостол Петр глаголет [1 Пет., глава 1]: ведуще яко неистленным серебром или златом избавистесь от суетнаго вашего жития отцы поданного, но честною кровию яко Агньца непорочна и пречиста Христа.

Вопрос. Чесому третьему научает сей артикул? **Ответ.** Научает, яко Христос точию по человечеству на кресте пострада, а божество Его ничтоже пострада [Дамаск. книга 3 глава 8]: якоже святыи апостол Павел глаголет [колос. глава 4]: ныне же примири в теле плоти своея смертью Его, представити вас святы и непорочны и неповинны пред собою: аще достоин в лепоту рещи, Бог во плоти страда.

Вопрос. Чесому четвертому научает сей артикул? **Ответ.** Учит яко страдание Христа Господа, паче иных человек бысть, якоже о том и пророк от лица Христова предвозгласи [плачь Иеремии, глава 1, стих 12]: вси иже к вам проходящий путь, дася обратят и да видят, аще есть болезнь, яко болезнь моя. смерть бо Христова превосходительнейша бысть, понеже самого себе яко жертву непорочну принесе за люди: якоже святыи апостол Павел глаголет

[ефес. глава 5]: предаде себе за ны, приношение и жертву Богу в воню благоухания. и инде [1 Тим. глава 2]: давыи себе избавление за всех.

Вопрос. Чесого пятого научает сей артикул? **Ответ.** Научает, яко Сын Божии воистину яко человек умре, и погребен бысть именитыма и славныма човекома во языке жидовском, Иосифом и Никодимом [Матф. глава 27]. прочее же к тому тело Его во гробе и запечатлено было, и стражи хранимо, имже и знаменитее еже из мертвых воскресение Его было. и гроб Его по пророчеству славен бысть [Дамаск. беседа о субот.], к нему же и ныне аще кто со благоговением приидет, и верою правою множество грехов очистит.

Вопрос. Чесого шестаго научает сей артикул? **Ответ.** Научает, яко в смерти Христове божество ниже от души, ниже от телесе Его отлучися [Дамаск. книга 3 глава 29]: но душа Его с божеством сниде во ад, и изведе оттуду вся святыя отцы, и вкупе с разбойником в рай введе. такоже с Богом Отцем и Святым Духом по единству божества на престоле и на небеси бе, и плотию на кресте и во гробе.

Вопрос. Понеже вспомянул еси о кресте, на немже Сын Божии плотию пострада, научи мене како о нем имам разумети? **Ответ.** Понеже о кресте вспомянух [Кирил Иерос. оглашен. глава 13], подобает его в велицей чести содержати, и употреблятися о нем выну: занеже Христос Господь спасение нам содея на нем. имже и святый апостол Павел, егда им хвалитися сице о нем глаголет [галат. глава 6]: мне же да не будет хвалитися, точию о кресте Господа нашего Исуса Христа, имже мне весь мир распялся, и аз всему миру. сицевым образом и всякий христианин святым крестом да хвалится, и часто украшается, имея знамение его на себе, в церкви, в дому же и в пути [Дамаск. книга 4 глава 12]; и ко всякому делу приступая, преже от знамения святого креста да творит начало, глаголю же молитвы брашно, и питие. понеже неприятель душ наших, силы ради Распеншагося на том кресте спасения ради человек, не могии зрети на то крестное знамение, бежит от нас. и не может нам пакости принести к доброму [Злат. в слове на евномиан и на многих местех].

Вопрос. Коим образом знамение святого креста имам на себе полагати? **Ответ.** Совокупити три персты правыя руки; сиречь великаго и малаго, и третиаго что подле малаго: в них же исповедуем таинство божественных триех ипостасей, Отца, и Сына, и Святого Духа единого Бога в триех лицах. два же перста протягнути вышнии и средний, и сим показуем тайну самого Господа нашего Исуса Христа, яко совершен Бог и совершен человек бысть нашего ради спасения. и тако сложивше персты, полагаем первое руку на чело, исповедующе яко едина истинная и вечная наша глава. Христос есть. якоже глаголет апостол [ефес. зач. 219], Господа нашего Бог Отец даде главу всех выше церквей, еже есть тело Его. потомже кладем руку на живот, исповедующе снитие Его на землю, и еже в пречистем чреве Богоматере безсеменное Его зачатие, Той бо пройде утробу ея яко солнце стекло, не вредив ключа Девы рожеством своим. потомже кладем на правое плече, исповедующе яко седит одесную Бога Отца. прочее ожидая дондеже положатся врази Его под нозе Его. потомже кладем на левое плечо, образующе, яко приидет паки второе на суд, и воздаст ошуюю сущим муку вечную, а одесную сущим вечный живот. и тако прекрестивше лице свое знамением крестным, глаголюще и молитву, Господи Исусе Христе Сыне Божии помилуй мя грешнаго, скончавая аминь, покланяемся Богу, яко да ошуюго стояния избавит нас, и благословение свое подаст нам.

Вопрос. Который есть пятый артикул? **Ответ.** И воскресшаго в третии день по писанием.

Вопрос. Многим ли вешем научает сей артикул? **Ответ.** Двоему: Первое, яко Сын Божии, якоже сам волею своею умре, сице силою Божества своего сам и из мертвых воста, по истинному своему словеси идеже глаголет сего ради Мя Отец любит, яко Аз душу мою полагаю, да паки прииму ю. никтоже возмет ю от Мене, но Аз полагаю ю о себе. область имам положити ю, и область имам паки прияти ю [Иоан. глава 10]. и се по писанию святых пророк, якоже сам глаголет [Лука глава 24], не сия ли подобаше пострадати Христу, и внити в славу свою: и начен от Моисея и от всех пророк сказааше има, и от всех писании яже о Нем.

Вопрос. Чесому второму научает сей артикул? **Ответ.** Научает, яко в том же сущем своем теле из мертвых воста, в нем же, и пострада и умре [Дамаск. книга 14 глава 58]. о нем же и раны свидетельствуют, которыя в руках, и ногах, и ребрах имел, ихже по воскресении из мертвых, и учеником своим показа глаголя [Лука глава 24]: видите руже Мои и нозе Мои, яко сам Аз есмь. осяжите Мя и видите, яко дух плоти и кости не имать, якоже Мене видите имуща: обаче то тело прославленное славою, ктому уже не подлежит немощем человеческим, яже прежде смерти име.

Вопрос. Который есть шестый артикул веры? **Ответ.** И возшедшаго на небеса и сидяща одесную Отца.

Вопрос. Многим ли вешем научает сей артикул? **Ответ.** Четырем [Дамаск. о вознес. Господни]: первое, яко которое тело Сын Божии восприят от пречистыя Девы, в немже пострада и умре, и из мертвых воскрес, в томже по воскресении из мертвых со славою и на небо възиде [Дамаск. книга 4 глава 1]. якоже свидетельствует Лука евангелист [Деян. глава 1]: и сия рек зрящим им взятыя, и облак подыят Его от очию их, и седе одесную Бога Отца. якоже и Марко евангелист свидетельствует о сем [Марк. глава 16; Дамаск. книга 4 глава 2], Господь же убо по глаголании Его к ним вознесся на небо, и седе одесную Бога.

Вопрос. Чесому второму научает сей артикул? **Ответ.** Научает, яко Христос с плотию възиде на небо, по божеству бо всегда со Отцем бе, и николиже от Него отлучися, яко единосущен Ему сыи: якоже о Нем свидетельствует Иоанн евангелист [Иоан. глава 1]: Бога никтоже виде нигдеже. едиnorodный Сын, сыи в лоне Отчи, Той исповеда. в лоне же слыша Отчи, то есть единого существа быти Ему.

Вопрос. Чесому третьему научает сей артикул? **Ответ.** Учит: яко тела сего ктому николиже оставит, еже единою прият. но вовеки е имети будет, по реченному Исус Христос вчера и днесь, Тойже и вовеки [евреом глава 13; Афан. о воплощении Бога Слова].

Вопрос. Чесого четвертаго учит сей артикул? **Ответ.** Научает, яко плотию Христос на небеси точию есть, а не везде по апостолу словеси [колас. глава 3; Дамаск. книга 4 глава 4]: Христос есть одесную Бога седея: разве пресвятыя тайны, еже в виде хлеба истинное пресвятое Его тело, и еже в вине истинная кровь Его есть: еже бывает от Духа Святаго сходящаго над дары призыванием от священника: о немже будет на своем месте учение.

Вопрос. Который есть седмый артикул веры? **Ответ.** И паки грядущаго со славою судити живым и мертвым, Егоже царствию несть конца [Деян. глава 1; Лука глава 1].

Вопрос. Многим ли вешем научает сей артикул? **Ответ.** Трем: первой, яко Христос приити имать паки на землю судити живым и мертвым. обаче не тако якоже первее смиренно и уничиженно, но в славе и величестве, якоже сам о себе глаголет: и узрят Сына человеческого грядущаго на облацех небесных с силою и славою великою. прежде Его пришествия знаменья известная предварят якоже слышим в Матфеи евангелисте.

Вопрос. Чесого другаго научает сей артикул? **Ответ.** Научает, яко в той последнии день праведнаго суда Божия, воздадут человеци слово о всех своих мыслех, и праздных словесех и делех [Дамаск. слово о умерших], якоже сам Избавитель учит: глаголю вам яко всяко слово праздно, еже аще рекут человеци, воздадут о нем слово в день судный.

Вопрос. Чесого третьяго научает сей артикул? **Ответ.** Научает, яко в той последнии день всяк кождо по делом своим восприимет. ови царство небесное наследят, к ним же речется [Матф. глава 25], приидите благословении Отца Моего, наследуйте уготованное вам царство от сложения мира. ови же муку вечную, к ним же глаголаю будет, отъидите от Мене проклятии во огнь вечный, уготованныи диаволу и ангелом его.

Вопрос. Который есть осмый артикул веры? **Ответ.** И в Духа Святаго и животворящаго, от Отца исходящаго, со Отцем и с Сыном съпокланяема, и сславима, глаголаващаго пророки.

Вопрос. Многим ли вешем научает сей артикул? **Ответ.** Трем [Дамаск. книга 1 глава 1; Вас. Вел. в слове о Св. Дусе]: первее, яко Дух Святыи истинныи есть Бог, соприисносущен Богу Отцу и Сыну, и единая силы с ними, славы же и величества: якоже о том и святыи апостол Павел научает нас, сиче глаголя [1 корин. глава 12; Афан. в симв.; Дионис. о Бож.

имен.], разделения же дарованием суть, а Тойже Дух. и разделения служении суть, а Тойжде Господь. и разделения действием суть, а тойжде Бог, действуяи вся во всех.

Вопрос. Чесому второму научает сей артикул? **Ответ.** Научает, яко Дух Святыи от единого Отца состава, яко от источника и корени в божестве от существа Его прежде век изыде [2 собор; Дион. о Бож. имен. глава 2], по Спасителеву учению [Иоан. глава 15; Дамаск. книга 1 глава 8, 9 и 10]: егда же приидет Утешитель, Егоже Аз послу вам от Отца Дух истинныи, иже от Отца исходит, Той свидетельствует о Мне. тако Господь научи, апостоли, соборы, и святии отци. за сию веру и мученици пострадаша.

Вопрос. Чесого третияго научает сей артикул? **Ответ.** Научает, якоже в ветхом законе, тако и в новом пророки и апостоли сказася, яко Дух Святыи есть изобретатель и податель писания святаго [Афан. о воплощ. Слова Божия], по апостольску учению [1 Пет. посл. глава 1]: нибо волею бысть когда человеком пророчество, но от Святаго Духа просвещаеми, глаголаша Божии человеци.

Вопрос. Много ли есть даров Духа Святаго? **Ответ.** Седьмь, якоже их описал Исаия пророк и Иоанн святыи во Откровении своем [Исаия глава 11; Апок. глава 4; Феофил. на Матф. глава 12].

Вопрос. Который есть первый дар Духа Святаго? **Ответ.** Премудрость, яже от небес даема бывает, в познавании божественных вещей, о нейже нас писание тако учит [Иаков глава 3]: яже свыше премудрость, первее убо чиста есть, потом же мирна, кротка, благопокорлива, исполнь милости и плодов благих, несуменна, и нелицемерна. сей противна есть мудрость мира сего, яже есть буйством у Бога, о нейже апостол Павел глаголет [1 кор. глава 1, 2], не обуюли Бог премудрость мира сего.

Вопрос. Который есть вторый дар Духа Святаго? **Ответ.** Есть смысл таинств веры, и воли Божии, якоже писание святое учит [Исход глава 36]: даде Господь Бог премудрость и разум во всяком писании и премудрости. и апостол к Тимофею глаголет [2 Тим. глава 2]: даст бо тебе Господь разум о всем. сему противно есть окаменение и нечувствие сердца, к верованию и познанию. якоже Спаситель глаголет [Лука глава 24]: о несмысленная и косная сердцем, еже веровати о всех, яже глаголаша пророци.

Вопрос. Который есть третий дар Духа Святаго? **Ответ.** Совет: егда кому даст Господь Бог ведение себе же и другу совещати, яже на спасение подобает, о немже и святыи апостол тако глаголет [Деян. глава 20]: не обинухбояся еже не сказати вам всю волю Божию. противно есть сему совету, нечестивых совет. о немже глаголет пророк [псалом 1]: блажен муж, иже нейде на совет нечестивых.

Вопрос. Который есть четвертый дар Духа Святаго? **Ответ.** Крепость, или мужество в вере истинней, и в житии благочестном, о нейже нас писание святое сице учит [1 кор. глава 12]. бодрствуйте, стойте в вере, мужайтесь, утверждайтесь. сему противно есть страх нечестивых. о немже писание тако глаголет [псалом 52]: тамо убояшася страха, идеже не бе страха.

Вопрос. Который есть пятый дар Духа Святаго? **Ответ.** Ведение закону и воли Божии: о нем же пророк от лица сице глаголет Бога [Иерем. глава 3]: дам вам пастырей по сердцу Моему. и будут паствити вас ведением и учением. противно есть сему незнание и неведение Бога, и закона Его: о нем же во псалмех тако глаголет [псалом 78]: излей гнев Твой на языки незнающыя Тебе, и на царствия яже имени Твоего не призваша.

Вопрос. Который есть шестой дар Духа Святаго? **Ответ.** Благочестие: еже всегда зрится при блазей вере же и добрых делех: в молитве же и в мудрствовании благодейств Божиих: о нем же апостол тако глаголет [1 Тим. глава 19]: благочестие на все полезно есть, обетование имея животу нынешняго и грядущаго. тому противно есть всякое нечестие, еже ни веры, ни добродетели имать.

Вопрос. Который есть седьмый дар Духа Святаго? **Ответ.** Страх Божии иже нарицается сыновен, о нем же во псалмех глаголет [псалом 33]: бойтесь Господа вси святии Его. тому противно есть, еже Бога не бояться. или убо бояться рабиим образом, якоже апостол глаголет [1Иоан. глава 4]: страха несть в любви, но совершена любы вон изгоняет страх. яко страх

муку имать. бояжеся не совершается в любви. страх же сыновен есть, дар Духа Святаго, еже добре веровати в Господа Бога, и непреткновенно соблюдать святыя, Его заповеди.

Вопрос. Много ли есть плодов Духа Святаго? **Ответ.** Всякая добродетель, и всякое благочестие, плоды суть Духа Святаго глаголются, по реченному [ефес. глава 5], плод духовный есть во всякой благостыни, и правде, и истине. и инде исчисляет апостол плоды Духа Святаго сие глаголя [галат. глава 5]: плод же духовный есть, любви, радость, мир, долготерпение, благодать, милосердие, вера, кротость, воздержание, на таковых несть закона.

Вопрос. Который есть девятый артикул? **Ответ.** Во едину святую соборную, апостольскую церковь.

Вопрос. Многим ли вешем научает сей артикул? **Ответ.** Четырем: первой, яко единая святая соборная апостольская церковь, обручицею Христовою есть, якоже святыи апостол Павел глаголет [2 кол. глава 11; ефес. глава 4]: обручих бо вас единому мужу, деу чисту представити Христови. ктому единая есть вера, едино крещение, един Бог: прочее единая есть истинная и церковь.

Вопрос. Что есть церковь? **Ответ.** Церковь есть собрание верных Божиих, во имя Господа нашего Исуса Христа соединенных во исповедании веры, и апостольством учении во всем мире, яко удов во едином теле Христове. под единою главою единого Господа нашего Исуса Христа, и в повиновении подобающем обретающихся [ефес. глава 5].

Вопрос. Чесому второму научает сей артикул? **Ответ.** Научает [Злат. на псал. 43], яко сия церковь соборная ни единая от человек имать нарицания себе, токмо от самого Христа, Который ея кровию своею честною искупи, и вечно себе обручи. и един главою ей яко приснаго тела есть.

Вопрос. Которая церковь есть первая в начале? **Ответ.** Церковь в начале Иеросалимская: сия бо есть материя учительная всех иных церквей, якоже о ней писание свидетельствует, и проповедается во имя Его покаянию, и отпущению грехов во всех языцех: наченше от Иеросалима [Лука глава 24]. и инде пишет [Деян. глава 15]: бывши же убо распри и стязанию не малу Павлу и Варнаве к ним, учиниша Павлу и Варнаве, и неким другим от них, ко апостолом и старцем во Иеросалим, о вопрошении сем. и на ином месте [Деян. глава 16]: и якоже прохождаху грады, предаяху им хранити нравы сужденныя от апостол и старец, иже во Иеросалиме. и тако церкви утвержахуся верою, и прибываху в число по вся дни.

Вопрос. Чесому третьему научает сей артикул? **Ответ.** Научает яко основанием и главою никтоже ин есть, токмо Христос, якоже писание святое учит [1 кор. глава 3]: основания бо иного никтоже может положить паче лежащего, иже есть Исус Христос. вся покори под нозе Его, и Того даде главу выше всех церквей, яже есть тело Его. и инде [ефес. глава 1]: и Той есть глава телу церкви, иже есть начаток перворожден из мертвых, яко да будет во всех Той первенствующая. и инде [ефес. глава 5]: зане муж есть глава жене, якоже и Христос глава церкви.

Вопрос. Чесого четвертаго научает сей артикул? **Ответ.** Учит того [Вас. Вел. на псал. 44], дабы есмы святей церкви яко матери нашей всякое покорение и послушание во всем отдавали, по заповеди Христове, рекшаго [Матф. глава 18]: аще не послушает кто свидетелей, повеждь церкви: аще же и церковь преслушает, буди ти яко язычник и мытарь. имать церковь и сию честь от Христа яко не токмо простых людей наказует, но и клириков, епископов же, и архиепископов больших, на соборе вселенском по винам их под запрещение влагати, и отлучати, яже сама единая сущи столпом и утвержением истины [1 Тим. глава 3]. имать же и писание святое толковати, и учителя похваляти, и прославляти.

Вопрос. Много ли есть церковных заповедей? **Ответ.** Аще их есть и немало, но главнейших есть девять: первое на всякий день по обычаю христианьскому, подобающее благочестие, еже любослушати пения в церкви, или самому отправить усердне якоже се, утреню часы, вечерню, и павечерню. а где лучится быти и святей литургии, то и большее слушати, наипаче же во дни праздничныя, и неделныя. вонь же егда святыя литургии христианин не слушает, здрав сый и не в пути. наипаче же егда церковь близу есть, смертно согрешает. благочестивому убо непрестанно молиться подобает по реченному [1 сел. глава

5]: непрестанно молитися. такоже учение где бывает, с прилежанием слушати: и о исполнении яже к житию христианскому подобает тщатися.

Вопрос. Которая есть вторая заповедь церковная? **Ответ.** Четыре посты поститися в лете по обычаю христианскому [прав. апост. 69]. Первыи пред рождеством Христовым, иже начинается в 15 ноемврия. Вторый пост великий, иже сам Господь постился: якоже о Нем евангелист пишет [Матф. глава 4]: и постился дней, 40, и ночей, 40, последи взалка. Третий пост апостольский, иже начинается по недели всех святых, на память того егда апостоли посылающе на проповедь евангелиа, постилися молящеся Господу Богу, яко да поможет им, яко же писание свидетельствует [Деян. глава 3]: тогда постившися и помолившися, и возложше руки на ня, послаша их. тако и мы постимся моляще Господа, яко да тоже евангелие, еже апостоли проповедали, распространение свое имело, и плод в человеческих сердцах прозябало. Четвертый пост зачинается перваго дня августа месяца, и пребывает даже до Успения Пресвятыя Богородицы.

Вопрос. Есть ли к тому еще иныи пост? **Ответ.** Во всякой недели должни есмы среду и пятницу поститися, по правилу 69 святых апостол. не поститижеся субботы и недели, и иных некоторых дней заповеданных, кроме великия субботы. в посте же паки провождати подобает, 14, день септеврия, воздвижения ради честнаго креста, и воспоминания ради волнаго страдания Христова: понеже того дне и евангелие о страстех Христовых чтется. такоже и 29 день августа месяца, усекновения ради честныя главы святаго пророка Иоанна Крестителя, в посте паки соблюдати, и навечерия Рождества Христова, и Богоявления.

Вопрос. Которая есть третья заповедь церковная? **Ответ.** Священников в велицей и достойней чести имети, яко Божиих слуг, и ходатаев наших, наипаче же духовнаго своего отца. такоже и тех которыя труждаются в проповеди слова Божия по реченному [1 Тим. глава 5]: прилежащи же добре попы, сугубыя чести да сподобляются, паче же труждающиися в слове и учении.

Вопрос. Которая есть четвертая заповедь церковная? **Ответ.** Четырици летом подобает исповедатися. аще и частее благоговейнейшии могут: но никтоже паки да не имеет того которыи бы не имел ни единою летом исповедатися: таковыи бо под клятвою и отлучением от церкви.

Вопрос. Которая есть пятая заповедь церковная? **Ответ.** Еретических книг не прочитати, и к соборицам их не ходити, и учения не слушати [прав. апост. 64; соб. Лаод. прав. 31, 32, 33, и 34]. такоже не сущу кому ученому, в словопрение с ними не въдаватися, и всячески отрицатися их, по писаному [Тим. глава 3], еретика человека по первом и втором наказании отрицайся.

Вопрос. Которая есть шестая заповедь церковная? **Ответ.** Господа Бога просити и молити за вся иже во власти суть, за царя же и за синклит, и за всю общую вещь. такоже и за духовныя власти. наипаче же за тех, иже тщатся распространяти славу Божию: к сему бо нас и апостол научает глаголя [1 Тим. глава 2]: молю убо прежде всех творити молитвы, моления, прошения, благодарения за вся человеки, за царя, и за вся иже во власти суть, да тихо и безмолвно житие проживем, во всяком благоверии и чистоте. се бо добро и приятно пред Спасителем нашим Богом, иже всем человеком хоцет спастися, и в разум истинный приити. такоже подобает молитися Господу Богу и о обращении язык, и неверных еретиков и отступников, ко святей истинней и вселенстей церкви Христове. прочее должни есмы Господа Бога молити и о сем, яко да избавит от работы языческакия всех христиан.

Вопрос. Которая есть седмая заповедь церковная? **Ответ.** Посты, молитвы, милостыни, служения братии нашей, с советом и повелением духовных. со тщанием должни есмы приимати и исправляти. понеже сиевыи обычай и при апостолах бысть якоже святое писание свидетельствует [Деян. глава 12]: и убо Петра стражаху в темнице, молитва же бе прилежна бываема от церкви к Богу о нем.

Вопрос. Которая есть осмая заповедь церковная? **Ответ.** Человек мирский, яже преданая суть церкви, никакоже да имать взимати на потребу свою, аще будут лежащыя, аще движимыя: такожде и духовнии да не имут их зле употреблять, но на потребу духовных и

убогих людей изнуряти, потом на украшение и пригожение церковное. наипаче же епископове тая имения церковная да истощаявают, на странноприимницы, на школы, и на пленники. и места им такая дозирати, которая помощи требуют, якоже христиане творили во дни святых апостол, о чем и писание сице глаголет [Деян. глава 11], ученики же аще имеяше кто, повелеша кождо их на службу послати живущым во иудеи братьям. еже и сотвориша, пославше к старцем рукою Варнавлею и Савлею.

Вопрос. Которая есть девятая заповедь церковная? **Ответ.** Брака в заповеданныя дни не творити [Вас. Вел. ко Амфилох. прав. 27; соб. 6 прав. 24], и в сродстве не поиматися, такоже на игрища неподобныя не ходити, и от обычаев непристойных соблюдатися.

Вопрос. Который есть десятый артикул веры? **Ответ.** Исповедую едино крещение во оставление грехов.

Вопрос. Многим ли вешем научает сей артикул? **Ответ.** Идеже воспоминается о святом крещении ту подает образ нам к разумению святых Господних таин.

Вопрос. Что есть тайна? **Ответ.** Тайна есть видимая вещь, уставлена же есть от Христа [Дамаск. книга 4 глава 14]: яже егда освящена бывает от священника, и ко употреблению человеком подаваема, приносит нам от Господа Бога невидимую благодать, освящающую человека и до вечнаго живота въспомогающую.

Вопрос. Много ли вещей разумеется в тайне? **Ответ.** Четыре: первая вещь, истинная и известная самая вещь, уставлена от Христа. вторая, словеса, ими же тайна освящение свое приемлет, силою Духа Святаго. третья, от кого тех таин сподобляемся. четвертая, дело тайны.

Вопрос. Много ли есть всех таин? **Ответ.** По числу даров Святаго Духа Святаго семь: еже церковию святою соборною утвержено есть.

Вопрос. Которая есть первая тайна? **Ответ.** Крещение: которая есть порождением от воды и Духа, и ввожением к церкви Божии, и отуду к царству небесному, по реченному [Иоан. глава 3], аминь, аминь глаголю тебе, аще кто не родится от воды и Духа, не может внити в царство небесное.

Вопрос. Что имать соблюдено быти в той тайне? **Ответ.** Ведают о сем священники, действующии в тайнах: якоже их научают церковнии потребники: вещь убо всегда бывает вода единая собою естественая, в ней же последи иных последовании, описаных в потребах, священник егда крестит, должен глаголати сия словеса Христова: крещается раб Божии во имя Отца и Сына и Святаго Духа. тая бо словеса с трема погружении совершают крещение.

Вопрос. Кая польза святаго крещения? **Ответ.** Егда человек в крещении в воде погружается и измывается, тогда невидимо в души первородный грех отмывает и очищает, якоже святый апостол Павел научает [1 кор. глава 6; Григ. Ниск. о крещ. Христове]: но омыстися, но освятитися, но оправдистися именем Господа нашего Исуса Христа, и Духом Бога нашего. в то время бываем удами Христовыми, и в Него облакаемся, по того же апостола Павла учению [гал. глава 3]: елицы бо во Христа креститесь, во Христа облекостесь. и сице бываем наследници Богу, сънаследници же Христу [рим. глава 8].

Вопрос. Что разумеется в том, егда кто приступает к святому крещению? **Ответ.** Подобаает хотящему восприяти веру христианскую [Потребник Кир. оглашен. 11], прежде крещения своего исповедати ю, аще совершен возрастом, самому собою [Дион. о церков. священнонач. глава 2]. аще ли младенец, то теми иже при крещении бывают, и за него обещаваются, чтобы более к тому подобало: еже самым то священником ведати достоин.

Вопрос. Которая есть вторая тайна? **Ответ.** Хризма, или миропомазание [Дион. о церков. священнонач. глава 4]: еже есть утверждение святаго крещения. которое крепка и вооружена устрояет крестившагося: и непобедима воина Христова показывает от всех навет невидимаго врага. по миропомазании бо и Духа Святаго восприятие бывает, яково бывало и во время святых апостол возложением рук, якоже о том и писание свидетельствует [Деян. глава 8]: тогда возложиша руце на ня и прияша Дух Свят, якоже и ныне помазанием, о нем же

и святый апостол Павел тако учит [2 кор. глава 1]. известуяи же нас с вами во Христа, и помазавый нас Бог, иже и запечатлевыи нас, и давыи обручение Духа в сердца наша.

Вопрос. Что подобает разумети в тайне миропомазания? **Ответ.** Первее вещь освященная уготованная, юже сами болшии архиереове освящают, от них же священницы приемлют себе к сей тайне, по описанному обычаю: в нем же должны сицевая слова употребляти: *Печать дара Духа Святаго*. Понеже се дело сея тайны над всяким да бывает, над ним же по крещении сея тайны употребляют, о ней же во образи явствено и святый Павел сице глаголя: егда же благодать и человеколюбие явися Спаса нашего Бога, не от дел праведных их же сотворихом мы, но по своей Его милости спасе нас, банею паки бытия, и обновлением Духа Святаго, Егоже излия на нас обильно Исус Христом Спасителем нашим.

Вопрос. Что разумеется в том, который к сей тайне приступает? **Ответ.** Первее, яко дабы скоро по крещении немедленно сия святая тайна над крещаемым совершилася, аще младенец будет, аще в возрасте: понеже святая церковь тыя тайны вкупе совокупила, крещение, и миропомазание. помазованы же бывают известныя уды тела. якоже о том в потребниках священницы описано имут.

Вопрос. Которая есть третья тайна? **Ответ.** Тайная вечеря Господня, на ней же истинное тело и кровь Христова, в виде хлеба и вина в воспоминание страдания Христова, и на вечное спасение наше бывает [Дамаск. книга 4 глава 9], освященно и ядимо по словеси Павла апостола [1 кор. глава 11]: елижды бо аще ясте хлеб сей, и чашю сию пиете, смерть Господню возвещаете, дондеже убо приидет. на спасение же наше сам Спаситель научает [Иоан. глава 6]: яды Мою плоть, и пияи Мою кровь, имать живот вечный и Аз воскрешу его в последний день: плоть бо моя истинно есть брашно, и кровь Моя истинно есть пиво.

Вопрос. Что или како имам соблюдать в сей тайне? **Ответ.** Первее егда священник имать совершати святую литургию, с намерением ума да совершает ю, еже святая церковь соборне убо описала своим, и несоборне [Вас. Вел. и Злат. и Иаков в литургии; Дионис. о церков. священнонач. глава 3]. ктому же да имать приналежащую вещь совершеную суцу и целу, еже есть, хлеб чистый пшеничный квасный. и вино естественное с водою мало смешаное. потом и иныя потребы, без нихже никакоже может святая литургия совершиться. якоже о том достаточно имамы на руку в служебниках церковных, или в потребниках.

Вопрос. Как освящается сия тайна в святей литургии? **Ответ.** Силою Господних словес, ихже на тайней вечери учеником рек [Матф. глава 26; Вас. Вел. и Злат. в литург.; Дамаск. книга 4 глава 14, той же в слове к Захарии]: се есть тело Мое, и се есть кровь Моя, егда сия словеса священником изглаголются над предложенным на престоле хлебом и вином, Дух Святый невидимо приходит: призывания ради священническаго, и прилежания и существо хлеба и вина пресуществляется в существо тела и крове Христовы, и бывают точию самыя виды хлеба и вина.

Вопрос. Чим разньствуует сия тайна от других? **Ответ.** Тем, яко сия тайна не точию в причащении по освящении тайною бывает, якоже прочия тайны: но и в самом освящении бывши тайною и жертвою за живыя и без причащения доколе виды хлеба, и вина целыя пребывают, совершеным всегда есть тела и крове Христовы тайною, и самым Христом Богом нашим: ихже ради вин ни едина иная тайна того имать, якоже та имать. понеже яко самому Богу, поклонение и честь воздаться имать от нас.

Вопрос. Которым образом сия тайна разумется имать? **Ответ.** Аще кто восхоцет причаститься тела и крове Господни, первее да имать, по описанному церковному чину с постом, и благоговением особным приготовить себе, потом исповедаться достойне, пред священником православным, и разрешение воспряти. такоже дабы никтоже в гневе не был. прочее егда кто к пресвятым тайнам приступает, подобает ему имети совершенную веру, яко истиннаго суцаго тела и крове Христовы причащается, имже преже да имать и с совестию опасно разсмотриться: по словеси святаго апостола Павла [1 кор. глава 11], да искушает же человек себе, и тако от хлеба да яст, и от чаши да пиет. яды бо и пия недостойне, суд себе яст и пиет не разсуждая тела Господня.

Вопрос. Разумеется ли сия святая тайна в равенстве, под двумя видами, якоже духовным, рекше священником, тако и мирским? **Ответ.** Тако воистину, а не инако. понеже и предание Христово таково а не инако есть, идеже глаголет [Матф. 25]: прием Исус хлеб и благослови, преломи, даяше учеником, и рече: приимите и ядите, се есть тело Мое. и прием чашю, хвалу воздав, даст им глаголя: пиити от нея вси, се бо есть кровь Моя новаго завета. яже за многия изливаема, во оставление грехов. тем ктому разумеется сице [Злат. на псал. 22 и 116], якоже в виде хлеба, телу Господню причащаемся, подобает убо всячески в виде вина, и крове Господни причащаться, аще восхощем известно себе спасение приобрести [Дамаск. книга 4 глава 14], яже аще и коснулобыся умышлении человеческих и неверие на се яко вещи те сумнительны ко спасению суть, пачеже ни единого известного такова самоделателя и первого содейственника иного имут на сию тайну изобрести, якоже есть Христос Господь: иже и заповеда на вечери ко апостолом, во оных словесех сице глаголя [Лука глава 22]: сие творите в Мое воспоминание.

Вопрос. Кая полза освящения же и причащения сея тайны? **Ответ.** Первая полза во освящении [Злат. быт. поменек.], якоже есть за живых жертвою безкровною отпущения ради грехов, тако и за умерших вторая в причащении, яко Христос в нас живет и мы в Нем, по реченному [Иоан. глава 6], ядши Мою плоть и пияи Мою кровь во Мне пребывает и Аз в нем. Третья полза. живот вечный наследуем: якоже таможе святое писание свидетельствует, и ядши Мя, и той жив будет Мене ради. там же ниже. ядши хлеб сей, жив будет вовеки. Четвертая полза, яко свободни бываем от бесовских искушении, понеже егда ошутит в нас живуща Христа, не имать наветовати на нас: якоже о сем пространно и в Катехизме великом обрящеши: zde же точно подобает ведати яко да всякий человек христианин святую литургию частее и з болшим благоговением слушал и тела и крове Господни причастник был [Злат. 1 Тим. глава 4].

Вопрос. Которая есть четвертая тайна? **Ответ.** Священство уставленное от Христа во апостолах [о священстве Злат.]. ихже возложением рук на епископах, от епископов же на священниках, яже освящени бывають чином церковным, на строение святых таин, и на преподавание спасительнаго учения Христова, ибо и Господь вообразя та два чина во оных словесех сице глаголя [Матф. глава 28]: шедше научите вся языки, крестяще я во имя Отца и Сына и Святаго Духа: якоже и апостол Павел тоже свидетельствует сице глаголя [1 кор. глава 4]: тако нас да непщует человек, якоже слуги Христовы, и строителя тайнам Божиим. таяже два чина в священстве, и иныя меншия в себе замыкають: тако убо потреба ведати, яко ни един на священство неруководимый и ни таин строителем быти не может, разве некоторых нужных случаев таин, ниже учения Христова подавати в церкви от омбона, по реченному [2 Тим. глава 1]: еяже ради вины воспоминаю тебе, возгревати дар Божии, живущий в тебе, возложением руку моею. несть бо нам дал Бог дух страха, но силы и любве и целомудрия. руководимые же силы никтоже имать, точно епископове.

Вопрос. Что еще ино разумеется в тайне священства? **Ответ.** Разуметися имать сие, подобает имети освященному на сию тайну некая подобающая свойства: Первее яко дабы был целым и здоровым телом, еже бы было без споны к служению, и летами бы якоже правила повелевають. Второе, дабы умел ведение належащее тому чину. Третье же, дабы и совесть ему в чем не препинала.

Вопрос. Кая есть вещь, или образ тайны священства? **Ответ.** Вещь есть возложение рук епископских на главе, приемлющаго священство. совершение же, учиненая тому молитва, юже епископ единою с возложением рук, над главою освящающагося глаголет: еже есть божественная благодать, и прочая.

Вопрос. Кая дела суть сея тайны? **Ответ.** Якоже и выше не единою поведася, яко строити тайнами Господними, и учити святому евангелию?

Вопрос. Есть ли яковья чины пред тою тайною? **Ответ.** Есть: о нихже добре сами епископове и священники ведають, и при освящении бывають оглашены егда орудия всякому чину належащия бывають предаваны.

Вопрос. Которая есть пятая тайна? **Ответ.** Покаяние, еже за грехи бывает с сокрушением сердечным во исповедании грехов, с надежею о отпущении, ради и излиания честныя крове Сына Божия, и то разрешением священническим, имже сила дана есть от Христа вязати же и решити [Афан. о воплощ. Бога; слово Злат. евреем глава 12 бес. 31].

Вопрос. Како или что подобает разумети в сей тайне? **Ответ.** Первее кающемся подобает быти христианином православно верующим. понеже без благия веры, ни единое же покаяние быти может. Второе, разрешити кающагося никтоже может, точию православный священник, понеже кроме церкви несть спасения и разрешения. Третьея которой к покаянию приступает, подобает ему имети сетование и сокрушение сердечное, за тья грехи, ими же ко Господу Богу и ближнему приражися. Четвертое: яко да имать вся своя грехи ихже кается исповедати: понеже не имать его разрешити от того, о чем не ведает священник якоже о том много свидетельств во святом писании обрящеши: а наипервее в деяниях апостолских [Деян. глава 19]: мнози же от веровавших прихождаху исповедающе, и сказующе дела своя. такоже и ко Иоанну Крестителю вси приходящи исповедовали грехи своя: якоже Марко евангелист свидетельствует [Мар. глава 1]: и исхождаше к нему вся иудейская страна и иеросалимляне и крещаша вси во Иордане реце от него, исповедающе грехи своя: к сему и заповедь апостольская послушествует сице глаголющи [Иаков.]: исповедайте убо друг другу согрешения. исповедатися убо никомуже иному имамы, точию пред теми, иже имут силу разрешити, и с ведением нам совещати.

Вопрос. Како бывает разрешение грехов от духовнаго отца? **Ответ.** По слышании исповеди от кающагося священник добрее разсудивши истинное его исповедание сокрушение же сердечное и предложение и устроение, ко целомудрению, такоже и произволение соблюдатися от грехов, разрешает его по достоинству покаяния от грех, в нихже имать разрешити или удержати. разрешая же его в молитвах своих и употребляет сими словесы глаголя, аз данною мне властию от Христа разрешаю тя, во имя Отца и Сына и Святаго Духа: имиже творит его приятна телу и крови Господни, яко и на судном дни не имать быти осужен по реченному: аминь аминь глаголю вам, елика аще свяжете на земли, будут связана на небеси: и елика аще разрешите на земли, будут разрешена и на небеси.

Вопрос. Кая дела сея тайны? **Ответ.** Явныя дела суть [Злат. на псал. 142 бес. 5 о покаян.], яко человек избыв греха приобретает себе якобы второе безгрешие, и от сына гнева и неблагодати, бывает сыном благодати Божия, егда доволно за грехи исправит каяся, по заповеди и учению духовнаго отца.

Вопрос. Которая есть шестая тайна? **Ответ.** Устроение брака, иже бывает общим изволением от тех, иже входят в то достояние без всякия пакости, и благословением священническим [Злат. на енес. бес. 56]: егда себе обручают взаимно, веру честь, и любовь брачную соблюсти молитвою и благословением утвержено есть, и тайною именуется по реченному [ефес. глава 5]: тайна сия велика есть. таковое устроение брака и писание святое похваляет [евреем глава 13]: честен брак и ложе нескверно.

Вопрос. Что или какия суть ползы сея тайны? **Ответ.** Первая польза есть [Злат. книга 1 о девстве], яко иже чистоты девства соблюдати не могут, то брака ради и всяко блудодеяния убегают, по реченному [1 кор. глава 7], обаче блудодеяния ради каждо свою жену да имать, и каяждо жена своего мужа да имать. Другая полза яко рожьдшиися дети от брака, не токмо честными глаголются, но и святыми суть. Третья полза яко во всяких случаях и немощех, наипаче муж жене, и жена мужеви ближайшим суть, якоже святое писание учит [Мар. глава 10]: от зачала созданиа, мужа и жену сотворил я есть Бог: сего ради оставит человек отца своего и мать, и прилепится к жене своей, и будут оба в плоть едину. Четвертая полза, яко в устроении брака, по образу его живущии, ни единыя хулы от Бога и от человек примут, ниже в совести скрупулу [обличение].

Вопрос. Кии конец брака есть? **Ответ.** Конец есть сему браку, чтобы человеческии род умножался и число бы назнаменованных и избранных в царство небесное исполнилося [Быт. 1].

Вопрос. Которая есть седмая тайна? **Ответ.** Помазание елеом с молитвою в немощи, отпущения ради грехов, и здравия ради телеснаго [Вас. ко Амфил. глава 27 о Святом Дусе], якоже писание святое учит [Мар. глава 6]: бесы многи исцеляху, и мазаху маслом многи недужны, и исцелеваху. И инде [Иаков 5]: болит ли кто в вас, да призовет попы церковныя, и да молитву сотворят над ним, помазавше его маслом во имя Господне, и молитва веры спасет болящаго. и аще грехи будет сотворил, отпустятся ему.

Вопрос. Како или что разумеется в сей тайне? **Ответ.** Первее дабы священници православныя веры были [собор Карф.]. Второе, дабы вещь належашая была еже есть масло, которое первоосвященно бывает от коего любо священника. Третие, дабы немощныи был, такоже православныя веры: и дабы прежде помазания маслом исповедался. Четвертое, дабы молитва яже внемгда помазуем бывает болящии глаголема была над ним, в нейже образ сея тайны воображается, рекше. Отче святыи врачу душам и телом, и прочая.

Вопрос. Кии успех или полза есть тайны сея? **Ответ.** якоже выше указася от святаго Иакова, тако и ныне глаголю, яко отпущение бывает грехов, и исцеление телу [1 кор. глава 11].

Вопрос. Который есть един надесятый артикул? **Ответ.** Чаю воскресения мертвых.

Вопрос. Многим ли вещем научает сей артикул? **Ответ.** Трем: Первей, яко известно и непременно имать быти из мертвых востание человеческим телесем, якоже благих, тако и злых, по реченному [Иоан. глава 5], не дивитесь сему яко грядет час, воньже вси сущии во гробех услышат глас Сына Божия, и изыдут сотворшии благая в воскрешение живота: а сотворшии злая в воскрешение суда.

Вопрос. Чесому второму научает сей артикул? **Ответ.** Учит якоже в сем сущем теле, в нем же живем в мире сем, в том и из мертвых востати имамамы [Дамаск. книга 4 глава 28]: обаче уже то тело безсмертно будет, по реченному от апостола [1 кор. глава 15], подобает бо тлеемому сему облещися в нетление, и смертному сему облещися в безсмертие.

Вопрос. Чесому третиему научает сей артикул? **Ответ.** Учит, яко всякая душа к своему сущему телу обращена имать быти. и с ним вкупе или мзду или мучение вечное восприимет совершенно. прочее же тако подобает веровати о всех святых, по словеси святаго Иоанна Златоуста [Злат. евреем глава 11 бес. 28]: кроме Пресвятыя Богородицы. которая уже есть и с душею и с телом на небо взята.

Вопрос. Чесого еще научюся от того артикула? **Ответ.** Научишися воспоминати всегда во уме, 4, вещи: яже суть, смерть, страшный суд, мука вечная, и царство небесное [Еклезиаств]. яко да размышляя о том готов бы был на смерть, и на страшном суде не осужден, и в муку не ввержен, но в царстве небесном могл быти.

Вопрос. Который есть дванадесятый артикул веры? **Ответ.** И жизни будущаго века, аминь [Иуда стих 24].

Вопрос. Чесому научает сей артикул? **Ответ.** Научает [Злат. к Феофил. глав. в лис. 5], яко вернии и избранныи Божии в будущем веце наследовати имут в царстве небесном вечный живот, утешение же и радость неизреченную, якоже святое писание учит [1 кор. глава 5]: ихже око не виде, и ухо не слыша и на сердце человеку не взыде, яже уготова Бог любящим Его. и инде [1 кор. глава 13]: видим убо ныне якоже зеркалом в гаданиих, тогда же лицом к лицу, ныне разумею отчасти, тогда же познаю якоже и познан бых.

Вопрос. Что или кое утешение в царстве небесном? **Ответ.** Ни едино тамо утешение телесное и временное будет, по апостольскому речению. несть бо царство Божие брашно и питие, но правда и мир и радость о Дусе Святе [рим. глава 14]. и инде [Матф. 24]: в воскресение бо ни женятся ни посягают но яко ангели Божии на небеси суть. таковое же утешение и радость не имать конца в царстве небесном.

Вопрос. Тожде ли утешение будет имети душа и тело, или ни? **Ответ.** Душа яже вкупе с телом в настоящем житии благоугоди Богу, купно с телом и в будущем веце прославится имать. славою же подобни ангелом будут, и просветятся яко солнце по реченному [Матф. глава 13]: тогда праведници просветятся яко солнце в царствии Отца их. зачим и едино утешение и радость купно и неразделно восприимут, аминь.

Вопрос. О осужденных же како имам разумети? **Ответ.** И тии такоже купно с душею и телом въвержени будут во огонь вечный, и тамо вовеки имут мучитися, по реченному Христом [Матф. глава 25]: идите от Мене проклятии во огонь вечный уготованныи диаволу, и аггелом его. и инде [Мар. 9]: идеже червь их не умирает, и огонь не угасает.

Вопрос. Будут ли имети конец себе осужденнии муками теми? **Ответ.** Никакоже [Феофил. на Матф. глава 25]: якоже бо иже на небеси суть вовеки нетленными суще, радости и утешения наслаждатися будут. тако и тии иже во аде суще, вовеки с душею и телом во огни без конца мучитися будут, и никогдаже съгорети имут.

Другая часть о надежи.

Вопрос. Что есть надежда? **Ответ.** Надежда есть истинное и несмущенное дерзновение, в Господе Бозе еже веровати, яко съспешением Его получити имамы спасение вечное [Вас. Вел. слово о подвиз.]. и о всех тех вещех, о нихже Господа Бога с верою сгожающеся [соединяющеся] по воли Его святей да просим якоже писание святое учит [евреом глава 10]: не отложите убо надежди вашае, яже имать мздовоздаяние великое. и инде [рим. глава 8]: упованием бо спасохомся. упование же видимо, несть упование. еже бо видит кто, что им уповае.

Вопрос. В чем належит надежда наша? **Ответ.** Надеждою нашею есть сам Господь Исус Христос, якоже святый апостол Павел научает, сице глаголя [1 Тим. глава 1], Павел посланник Исус Христов, по повелению Бога Спаса нашего и Господа Исуса Христа, упования нашего, и то в лепоту есть: понеже в Нем и Им живот вечный, и всякая благодать даема бывает, якоже и писание святое сице глаголет [Иуда ст. 20]: вы же возлюбленнии, святою вашею верою, назидающе себе Духом Святым и молящеся, сами себе в любви Божии соблюдайте, ждуще милости Господа нашего Исуса Христа в жизнь вечную.

Вопрос. Что в надежди разумеется? **Ответ.** Две вещи разумеются, молитва Господня и блаженства.

Вопрос. Что есть молитва? **Ответ.** Молитва есть прошение с простотою от веры ко Господу Богу, с надежою содержания Егоже просим, или прославляем, и благодарим.

Вопрос. На много ли частей молитвы делятся? **Ответ.** На три: первая часть, еюже Господа Бога прославляем, величества Его ради и славы. Вторая часть, егда о чем Господа Бога просим. Третья часть есть, егда за прешедшая благодеяния Оного благодарствуем.

Вопрос. Которая есть молитва известнейшая, и изряднейшая? **Ответ.** Молитва Господня, ейже сам Исус Христос научи апостолы своя, и тако заповеда молитися глаголя, вы же сице молитесь, Отче наш иже еси, и прочая [Матф. глава 6].

Вопрос. На много ли частей делится та молитва Господня? **Ответ.** На три части [Феофил. на Матф. глава 6]: первое есть предисловие, в нем же воображается к кому имам молитися. Другая часть, в ней же воображается дело, о котором просим или молим. Третья часть есть, замкнение молитвы Господни, в ней же извещение есть, яко о чем есмы просили, получити имамы то, силою и помощью Бога.

Вопрос. Которое есть предисловие молитвы Господни? **Ответ.** Сие есть Отче наш иже еси на небесех.

Вопрос. Чесому научаюся от того предисловия? **Ответ.** Первее познаеши, яко егда приступаеши Господу Богу молитися, тогда имаша быти в добром уготовании, мысли же и сердца, такоже и совести, дабы тебе та молитва пред Ним приятна была. потом себе познаем, яко сынове есмы Отца небеснаго по благодати. тем и просяще велико дерзновение к Нему имети имамы. а яко есмы сынове Божии, писание святое научает. елици же приаща Его, даст им область чадом Божиим быти, верующим во имя Его [Иоан. глава 1]. и инде [гал. глава 4]: да якоже есте сынове. посла Бог Духа Сына своего в сердца ваша, вопиюща авво Отче.

Вопрос. Чесого еще от того научаюся? **Ответ.** Научаемся, яко вси имамы единаго Отца, иже нас ради, яко детей своих ради, все готов сыи сотворити, якоже глаголет Христос [Матф. глава 6]: весть бо Отец ваш небесный, яко требуете сих всех. и инде [Матф. глава 23]: не зовите себе отца на земли, един бо есть Отец ваш иже на небесех.

Вопрос. Чесого болше научает то предисловие? **Ответ.** Учит того, дабы есмы единого Отца имуще, вси вернии и избраннии Божии, исповедовали себе быти братиею, и друг за друга молилися по писанию [Иаков глава 5], молитися друг за друга, яко да исцелеете.

Вопрос. Како имам о сем словеси разумети, еже на небесех? **Ответ.** Господь убо и Бог не точию на небеси, но и везде сый, и все исполняет. обаче особным образом и с болшею благодатию, на небеси пребывает, и тамо престол свой имать, якоже во псалмех глаголет [псалом 102]: Господь на небеси уготова престол свой, и царство Его всеми обладает.

Вопрос. В другой части молитвы много ли прошений есть? **Ответ.** Седьмь: Первое, да святится имя Твое.

Вопрос. Что в себе заключает то прошение? **Ответ.** первое просим и молим Господа Бога дабы дал нам житие в благочестии препровождати, еже по воли Его и по благоволению жительствовати: им же бы имя Его святое прославляемо было, якоже сам научает [Матф. глава 5; Злат. на Матф. глава 6 бес. 20; Феофил. там же]: тако да просветится свет ваш пред человеки, яко да видят ваша добрая дела, и прославят Отца вашего, иже есть на небесех.

Вопрос. Чесому второму имам научиться от того прошения? **Ответ.** Научишися сему [Нис. в слове 8 о мол. Господни], яко да ни единыя злобы сотвориши когда, такоже и прелести, имже бы имя Божие похулено было: яко да не будет речено и о тебе сице [рим. глава 2]: имя бо Божие вами хулятся во языцех. и инде [2 тит. глава 3]: имуще образ благочестия, силы же его отвергшеся.

Вопрос. Которое есть второе прошение? **Ответ.** Да приидет царствие Твое.

Вопрос. Что заключает в себе то прошение? **Ответ.** Первое просим и молим, дабы в сердцы нашем пришед Господь Бог жительствовал благодатию и милостию своею, зачим имети нам правда, мир, и радость, а грех бы ктому не царствовал в сердцы нашем и теле, по апостольску учению [рим. глава 6]: да не царствует убо грех в мертвенем вашем теле, во еже послушати его в похотех его, ниже представляйте уды ваша оружия неправды греху, но представляйте себе Богови, яко от мертвых живы, и уды ваша оружия правды Богови.

Вопрос. Что второе замыкается в том прошении? **Ответ.** Исповедуется се: дабы нам имеючи добру совесть, усердно Господа Бога молити, яко да даст нам христианьски разлучитися от телесе, и быти с собою всегда, якоже и апостол Павел глаголет о себе [филип. 1]: желание имьи разрешитися и со Христом быти много паче лучше. такоже просим, яко да и число избранных Божиих исполнится, и скорейше пришествие Христово быти могло, и воскресение мертвых. и дабы неприятель душ наших ктому уже в мире сем не царствовал, но Бог бы был во всех [кор. глава 15].

Вопрос. Которое есть третье прошение? **Ответ.** Да будет воля Твоя, яко на небеси и на земли.

Вопрос. Что заключается в том прошении? **Ответ.** В сем прошении первое просим Господа Бога [Феофил. на Матф. глава 5], дабы дал нам познати волю свою святую, яже есть воображена к заповедех Его святых и во всем учении Христа Господа, во евангелии описанном. познавшим же нам волю Его исполняти бы помощию Его, по силе нашей, якоже сам Христос научает [Иоан. глава 14]: имейи заповеди Моя и соблюдая их, той есть любяи Мя. а любяи Мя возлюблен будет Отцем Моим, и Аз возлюблю его, и явлюся ему сам.

Вопрос. Чесому второму научиться имам от того прошения? **Ответ.** В том прошении просим Господа Бога, дабы якоже на небеси ангели исполняючи волю Божию во всем соединителне Его славят, сице бы и христиане на земли, в любви и соединении единеми усты, и едином сердцем Господа Бога прославляючи, волю Его святую исполняли: о чесом на всякий день и православная церковь Господа Бога просит.

Вопрос. Которое есть четвертое прошение? **Ответ.** Хлеб наш насущный даждь нам днесь.

Вопрос. Что заключается в сем прошении? **Ответ.** В сем прошении первое просим и молим Господа Бога, дабы дал нам того хлеба, имже душа человеческая живет, рекше слышание слова Божия: о немже сам Христос тако глаголет [Матф. глава 4; Нис. слово 4 о молит. Господни; Злат. и Феофил. на мес. поменен.]: не о хлебе едином жив будет человек, но

о всяком глаголе исходящем из уст Божиих. Потом просим о другом хлебе, имже душа живет, дабы есмы достойне тела и крове Христовы причащатися имели, на вечное наше спасение. таковым хлебом самого себе называет Спаситель наш Христос [Иоан. глава 6]: Аз есмь хлеб животный, иже сшеды с небесе. аще кто снесть от хлеба сего жив будет вовеки. и хлеб егоже аз дам плоть Моя есть, юже Аз дах за живот мира.

Вопрос. Чесому еще от того прошения научиться имам? **Ответ.** Просим убо и о сем временном хлебе, дабы его нам дал в мире насладитися: а при хлебе и о всяких иных потребах без них же человек не может жити, обаче не преизлише. словом же днесь, отдаляет излишнее попечение о временных вещех будущих: якоже на ином месте научает сице глаголя [Матф. глава 6]: не печитесь убо на утреи, утреннии бо собою печется: довлеет дневи злоба его.

Вопрос. Которое есть пятое прошение? **Ответ.** И остави нам долги наша, якоже и мы оставляем должником нашим.

Вопрос. Что имеет в себе то прошение? **Ответ.** Первее в сем прошении просим [Нис. о мол. Господни слово 5], дабы вся грехи яже есмы по святом крещении сотворихом отпустил нам Бог, якоже и мы отпускаем должником нашим: по глаголющему словеси от Христа [Матф. глава 6]: аще бо отпускаете человеком согрешение их, отпустит и вам Отец ваш небесный. аще ли не отпускаете человеком согрешения их, ни Отец ваш отпустит вам согрешения ваших.

Вопрос. Которое есть шестое прошение? **Ответ.** И не введи нас во искушение.

Вопрос. Что заключается в том прошении? **Ответ.** Первее в сем прошении просим Господа [Нис. о мол. Господни, слово 5], дабы вовремя егда неприятель на нас воует, похотьми телесными и мирскими, неотступно благодатию своею святою нам помогал: понеже без Него ничесоже можем творити. якоже сам глаголет [Иоан. глава 15]: яко без Мене не можете творити ничесоже. немощи бо ради нашея сила Христова прославляема бывает, якоже ко апостолу Павлу рекл [2 кор. глава 12]: довлеет ти благодать Моя, сила бо Моя в немощи совершается.

Вопрос. Очесом второе в сем прошении Господа Бога просим? **Ответ.** Просим [Феофил. глава 6 на Матф.], яко да всем врагом и гонителем церкви Христовы сердца смирити, и избавит нас от гонителей, и от злокозньства их от диявола умышленаго. аще ли когда и случится впасти во искушения, то дабы паче силы нашея не попушал нам искуститися по реченному [1 кор. глава 10]: силен же Бог иже не оставит вас искуститися, паче еже можете, но сотворит со искушением и избытие, яко возмощи вам понести.

Вопрос. Которое есть седмое прошение? **Ответ.** Но избави нас от лукаваго.

Вопрос. Что замыкается в том прошении? **Ответ.** В сем прошении просим и молим Господа Бога [Злат. на Матф. глава 6 бес. 12; Нис. о мол. Господни слово 5], дабы нас от сатаны защищал, который всякому злу есть начинатель, собою же и злыми человеки. zde же просим дабы дал нам исправление житию, и престати от грехов: и удалил от нас за грехи уготованное нам мучение, временное же и вечное.

Вопрос. Которая есть третья часть молитвы Господни? **Ответ.** Замыкание: яко Твое есть царство и сила и слава, вовеки, аминь.

Вопрос. Что заключается в тех словах? **Ответ.** Тья слова глаголати в конце сея молитвы сам Христос научил в Матфеи евангелисте [Злат. на Матф. глава 6, бес. 15], яже заключают в себе извещение сицевое: яко аще что просим по воли Божии, то все сотворити нам возможет Он: понеже сила и господьство Его во всем мире есть: и то не тако нас доля грешных человек, якоже славы своя ради святых. сего ради извещаемся от сего по воли Его святой просити, якоже Иоанн святый научает нас сице глаголя [1 Иоан. глава 5]: и се есть дерзновение еже имамы к Нему, яко аще что просим по воли Его, послушает нас. Аминь же полагается на концы ради того же извещения, яко тако, а не инако есть.

Вопрос. Много ли есть блаженств? **Ответ.** Христос в Матфеи евангелисте девять блаженств изчисляет [Матф. глава 5], якоже и Златоуст глаголет [Злат. на Матф. глава 5 бес.

15; Феофил. там же], Моисей в правде десять заповедей даде, Исус же Господь Моисеов девять блаженств.

Вопрос. Которое есть первое блаженство? **Ответ.** Блажени нищии духом, яко тех есть царство небесное [Той же Злат. на 1 кор. глава 15; Злат. на Матф. глава 5 бес. 15].

Вопрос. Чего имам научиться в том блаженстве? **Ответ.** Научишися сему, яко нищета добровольная, яже от произволения человеческого сердца обретаемая воистину человека сотворит убогим и блаженным, то бо есть болше и богатства. понеже и богатства ничтоже сему препинают к любви к Богу и ближнему: якоже творили первии христиане: иже имения своя продающе, и пред ногама апостольскими полагали сребро на строение убогим и неимущим братии [Деян. глава 4]: и ни един же от имения своего глаголаше свое быти, но бяху им вся обща.

Вопрос. Которое есть второе блаженство? **Ответ.** Блажени плачущии, яко тии утешатся.

Вопрос. Чего имам научиться в том блаженстве? **Ответ.** Научишися сему: яко тии поистине плачуще, иже пребывающе в мире сем, за грехи своя, и ближняго плачют. такоже плачут и тии иже обиды приемлют от сильнейших: якоже вдовы, сироты, и убозии человеци, и неведующии о себе совестити [Злат. на Матф. глава 5 бес. 15; Феофил. там же; Нис. в слове 3 о блаженных]. плачущижеся, и сетующии в работе у поганых, и терпящии гонение веры ради христианския: иже убо в мире сем блаженными суть, утешение имущее духовное: во оном же веце, истинное на небеси будут имети.

Вопрос. Которое есть третье блаженство? **Ответ.** Блажени кротции, яко тии наследят землю.

Вопрос. Чего имам научиться в том блаженстве? **Ответ.** Научишися [Нис. в слове 12 о блажен.], яко тии кротци суть, иже смиренно мудрствующе о себе, и не высящесе над другими, естеством тела, имением, хитростию, и житием: но о всем в себе всегда словеса Христова глаголюще, егда сотворите вся повеленная вам, глаголите, яко раби непотребни есмы, яко еже должны бехом сотворити, сотворихом.

Вопрос. Которое есть четвертое блаженство? **Ответ.** Блажени алчущии и жаждущии правды, яко тии насытятся.

Вопрос. Чего имам научиться в том блаженстве? **Ответ.** Научишися, яко тии суть влепоту блажени, яже по достоинству правду творящии. такоже и тии блажени суть ихже неправедно осуждают и порицают егда они благодарне то терпяще Бога ради приемлют. zde же имут научиться судии и властели, дабы правду всякому творили, аще хотят быти блаженными. воспоминающе псаломская словеса [псалом 9]: суди сиру и смирену, да не приложит потом величатися человек на земли. Такоже не имут погубити надежды и тии, иже алчют всегда правды, и не могут получить, введуще пророческая словеса [псалом 9]: яко не доконца забвен будет нищии, и терпение убогих не погибнет доконца: но видяще лице Божие, насыщени будут правды, вегда явится им слава Его.

Вопрос. Которое есть пятое блаженство? **Ответ.** Блажени милостивии яко тии помиловани будут.

Вопрос. Которыя суть дела милости? **Ответ.** Дела милости сугубы суть, едины телесныя, а другия душевныя [Феофил. на Матф. глава 25].

Вопрос. Которыя суть дела милости телесныя? **Ответ.** Седмь: ихже сам Христос изчисляти будет на судном дни [Матф. глава 25]: алчущаго накормити жаднаго напоити: нагаго одяети: в темници суца посетити и утешити, немощнаго посетити, и советовати ему, еже к спасению ему належит, и к здравию телесному. странна суца, или того иже где не имать главы своя подклонити, в дом свой прияти, и построити его по силе своей, а его кондиции [исправлению] . к темже шестим добродетелем и се надлежит, еже благодарне приимати в дома своя тех иже в путь шествующих обещавшихся на святая места, не оставляюще к сему и того еже бы убогим и неимущим, и бедным немощным, на осуждение наше по улицах лежати. но приимати их в дома своя, и служити им спасения ради души своя. Седмое же дело милости, писание святое нам в Товии заповедует, умершаго погребсти,

наипаче же тех, иже не оставиша ничтоже по себе, чим бы тело их погребсти, а при погребении просити и молити Господа Бога, за отпущение грехов душам их. тако бо и ангел Рафаил к Товии глагола [Товия глава 12], когда молился еси со слезами, и погребал еси мертвыя, и оставль обед свой, мертва скры в день в дому твоём, а в нощи погребе его, аз принесох молитву твою Господу Богу.

Вопрос. Которая суть дела милости, належащая души? **Ответ.** Тая же седьмь: первое убо есть человека согрешающаго от греха отвести, якоже святое писание учит [Иаков 5]: братие аще кто в вас заблудит от пути истины, и обратит кто его, да весть, яко обративый грешника от заблужения пути его, и спасет душу от смерти, и покрывает множество грехов.

Вопрос. Которое есть второе дело милости душевныя? **Ответ.** Неведущаго научити, первое воли и закону Божию, како имать жителствовати по христиански. потом како молитися Богу. Третие, еже любо что к доброму житию належит, а ты что умееши, ближняго своего без зависти научай, да не будеши осужден якоже иже и приемый един талант [Матф. глава 25].

Вопрос. Которое третье дело милости душевныя? **Ответ.** Требуемому совета, подати здравый совет, якоже от заблужения к правому пути. сице и ко всем добродетелем: якоже и выше речеся о сем, идеже о дарех Духа Святаго, учение бысть.

Вопрос. Которое есть четвертое дело милости душевныя? **Ответ.** Господа Бога просити и молити, за всех иже во власти суть, и за желающих благодать и милость Божию получитьи: якоже пространнее имаши о сем обрести, и в заповедех церковных.

Вопрос. Которое есть пятое дело, милости душевныя? **Ответ.** Сетующаго, или скорбящаго утешити, не точию словом добрым, но и делом.

Вопрос. Которое есть шестое дело, милости душевныя? **Ответ.** Не попускати творити обид, такоже и правоверующих прельщати от еретик, но всяко тщатися о взыскании и о навращении всякого, иже не есть в вере православней.

Вопрос. Которое есть седьмое дело, милости душевныя? **Ответ.** Обиды, яже аще от кого любо яковым образом наносимыя нам, с радостию терпети, и презирати я, яко да Господь Бог грехи наша презрит. сия же вся дела милости подобает нам, с великим прилежанием и усердием совершати, болшия ради мзды от Бога.

Вопрос. Которое есть шестое блаженство? **Ответ.** Блажени чистии сердцем, яко тии Бога узрят.

Вопрос. Чего научитися имам в том блаженстве? **Ответ.** Блажени суть тии, иже во всех добродетелех чистоту соблюдают, не точию телесную, но и сердечную, рекше ниже помыслом подвизающесе на всякую нечистоту: еуже и брак соблюдается [Феофил. на Матф. глава 5; Нис. слово 5 о блажен.].

Вопрос. Которое есть седьмое блаженство? **Ответ.** Блажени миротворци, яко тии сынове Божии нарекутся.

Вопрос. Чего научитися имам в сем блаженстве? **Ответ.** Первее сего блаженства причастници суть священници, иже жертвою безъкровною Бога к человеком примиряюще. тако же и мирстии благочестивии, иже молитвами своими милостива Бога сотворяюще ходатайствующе о ближних, к сему блажени суть и тии, иже межю людьми мир творящи: егда заступающе ходатайствуют, дабы вьсуе кровь христианская не проливалася.

Вопрос. Которое есть осмое блаженство? **Ответ.** Блажени изгнани правды ради, яко тех есть царство небесное.

Вопрос. Чего имам научитися в сем блаженстве? **Ответ.** В том блаженстве заключаются вси иже правду глаголюще, от людей приемлют гонение, якоже суть, учителя, судии, и властели, егда правду глаголати имут, на нюже от человек злобу претерпят.

Вопрос. Которое есть 9 блаженство? **Ответ.** Блажени есте егда поносят вам, и изженут и рекут всяк зол глагол на вы, лжуще мене ради. радуйтеся и веселитесь, яко мзда ваша многа есть на небесех.

Вопрос. Чего научитися имам в сем блаженстве? **Ответ.** Сие блаженство ключается единым мучеником, и ко всем тем иже гонение терпят, егда им кто благочестие заграждает,

церкви же и имение и волю отъемлет, от чинов и из градов изгоняет: иногда же неции веры ради и смерти предают.

Третья часть, о любви к Богу, и ближнему.

Вопрос. Кая наука есть третьей части? **Ответ.** Есть наука о любви к Богу и ближнему на тех бо двоих заповедех весь закон основан есть [Злат. на псал. 140], якоже научает Христос сице глаголя [Матф. глава 22]: в сею обою заповедию, весь закон и пророци висят.

Вопрос. На которых заповедех любовь к Богу и ближнему создается? **Ответ.** В заповедех от Бога Моисеом преданных на дву скрижалех. На первой скрижали суть четыре заповеди Божия, яже научают како имамы любити Господа Бога своего, и соблюдатися к Нему. На другой скрижали суть шесть заповедей, яже научают како имам любити ближняго своего яко себе, и соблюдатися к нему.

Вопрос. Что или како разумети в тех заповедех? **Ответ.** Первее имаши разумети, яко заповеди едины суть яже заповедуют добре творити. а другия яже запрещают зле творити. и аще кто доброе творит, от злаго же соблюдается, таковыи заповеди Божия сохраняет.

Вопрос. Что бывает от того, егда кто исполняет заповеди Божия? **Ответ.** Исполнение заповедей есть, плод веры христианския, по Спасителеву учению [Матф. глава 7]: от плод их познаете их. еда объемлют от терния грозды, или от репия смоквы. такоже и инде: о сем разумеют вси, яко Мои ученици есте аще любовь имате межю собою.

Вопрос. Что от того бывает, егда кто не соблюдает заповедей Божиих? **Ответ.** Ражается от сего грех, а от греха смерть, по апостольскому речению [рим. глава 5]: сего ради, якоже едином человеком грех в мир вниде, и грехом смерть, и тако во вся человеки смерть вниде, онем же вси согрешиша.

Вопрос. Заповеди же суть Божия, христианския ли добродетели, или греху искушение? **Ответ.** Тако есть воистину: зане же аще кто в заповедех Божиих всегда поучается, той добродетелно в мире живет. а иже о заповедех Божиих нерадит, той согрешает.

Вопрос. Которыя же суть первыя добродетели христианския? **Ответ.** Первыя добродетели христианския суть три, без них же никтоже спасется. а нарицаются богословскими: рекше, вера, надежа, и любовь [1 кор. 13].

Вопрос. От тех добродетелей которыя иныя добродетели первее рождаются? **Ответ.** Другия три добродетели, благочестия христианскаго [Матф. глава 16]: молитва, и милостыня, о них же во своем месте сказана наука.

Вопрос. От тех паки добродетелей, которыя иныя еще добродетели исходят? **Ответ.** Четыри добродетели роднейшии [Нис. на Екклесиас. бес. 6]: мудрость, правда, мужество, и целомудрие.

Вопрос. Како имам разумети о мудрости христианстей? **Ответ.** Имаши ведати, яко мудрость есть христианская. познание воли Божии, еюже како в мире подобает житьствовати якоже святыи апостол Павел научает [ефес. глава 5]: не бывайте несмыслени, но разумевающе, что есть воля Божия. при сей мудрости разумеется истинная и нелицемерная целость, о ней же сам Христос глаголет [Матф. глава 10]: будите мудри яко змия, и цели яко голубие.

Вопрос. Како имам разумети о правде христианстей? **Ответ.** Правда есть христианская, не токмо любящих любити, но аще кто и зло сотворит нам, не отмщавати: и не токмо не отмщавати, но и Бога молити должны есмы.

Вопрос. Како имам разумети о целомудрии? **Ответ.** Целомудрие есть соблюдение меры по достоянию, во всех путех христианских, по апостольску учению [рим. глава 13]: яко во дне благообразно да ходим, не козлогласовании и пианствы, не любодееянии и студодееянии, не рвением и завистию. но облечитесь Господем нашим Исус Христом, и плоти угодия не творите в похоти.

Вопрос. Како имам разумети о мужестве? **Ответ.** О мужестве убо выше научихомся, идеже о дарех Духа Святаго речеся, и тамо чти.

Вопрос. Что есть грех? **Ответ.** Грех ничтоже ино есть, разве преступление закона, и воли Божии: от него же раждается смерть [рим. глава 3].

Вопрос. На koliko делится грех? **Ответ.** Един грех смертныи, а другии повседневныи, якоже научает святыи Иоанн Богослов [1 Иоан. глава 5]: есть грех к смерти, и есть грех не к смерти.

Вопрос. Что есть грех смертныи? **Ответ.** Грех смертныи есть, преступление к Богу, или к ближнему своему: егоже ради отщетеваемся благодати Божия, и не каемся, и умираем в нем, вечно умираем: и того ради смертныи он грехом называется.

Вопрос. На koliko делятся смертныи грехи? **Ответ.** На три части: в первой части суть грехи смертныи, тяжчайшыа [главнейшыя]. в другой части, на Дух Святыи. в третьей части грехи суть вопиющыи к Богу о мщении.

Вопрос. Много ли есть грехов смертныи главнейших? **Ответ.** Семь: 1 чревообъядение. 2 блуд [студодеяние]. 3 сребролюбие. 4 гнев. 5 уныние. 6 тщеславие. 7 гордость.

Вопрос. Которыи суть грехи на Дух Святыи? **Ответ.** Аще кто видя на себе излишнюю благодать Божию, дерзновенно сыи согрешает. второе, отчаяние милости Божии. третье, сопротивление, на явную и познанную правду [Быт. глава 4]. такожде творити свары между братиею.

Вопрос. Которыи суть грехи вопиющыи к Богу о мщении? **Ответ.** Первое убийство волное: потом содомский грех: третье, утеснение вдов и сирот: четвертое, удержание мзды наемничи [псалом 145, 36]. ктому прочее безчестие родителей и добродеев.

Вопрос. Что есть грех повседневныи? **Ответ.** Есть преступление к воли и заповеди Божии. имже к Богу и ближнему на всяк день приражаемся: обаче благодати Божии не оставляет от нас: зане же скоро о нем рассмотрим, и каемся. а тех грехов без числа есть.

Вопрос. Может ли человек быти причастник чужих грехов? **Ответ.** Может: егда кто могии кого от греха отвести, не отведет: тако же кто не накажет, имея силу к наказанию, глаголю же, господин раба, и подданного. отец сына, муж жену: и всякий начальствующии подначальствуемаго. тако же кто дает кому возбуждение ко греху яковым любо образом, причастником есть греха того.

Вопрос. Которая есть первая Божия заповедь первыи скрижали? **Ответ.** Сия есть [Исход 20]: Аз есмь Господь Бог твой, изведыи тя от земли египетския, от дому работнаго. да не будут тебе бози инии, разве Мене.

Вопрос. Како имам разумети о сей заповеди? **Ответ.** Имаши разумети, яко Господь Бог творец сыи небу и земли, Егоже кроме несть иного, жидовскому языку объявляя себе, и заповедуя, яко да иного бога не имеют, благодеяние сие пред лице им представляет, яко из работы египетския изведе их. мы же христиане не равным и единым образом, Того единого Бога исповедати, и славити, и заповеди Его святыи соблюдатьи должни есмы, со апостолом Павлом [колас. глава 1]: благодаряще Бога Отца, призвавшего вас в причастие наследия святыи во свете, иже избави нас от власти темныи, и престаи в царство Сына любви своея, о Немже имаши избавление кровию Его, и оставление грехом.

Вопрос. Кто преступает сию заповедь? **Ответ.** Первее преступают заповедь сию тии иже не глаголют Бога быти, якоже псалом глаголет [псалом 13; Дамаскин книга 4 глава 3]: рече безумен в сердце своем, несть Бога. потом преступают и тии, иже много богов быти разумевают, якоже невернии языци. третье преступают тии, иже невидимому врагу предаются: якоже суть чернокнижники, чаровники: и вси иже волхвующи, и бесом служащи: за теми и вси еретици, иже зле веруют о едином Бозе во Святей Троице [филип. глава 3]: к сему прочее иже болше надежду полагающе на благовременство, на мудрость и учение, на сокровища же и на доброту телесную и други, и на самех себе, неже на Бога.

Вопрос. Како имам разумети о призывании святыи на сем месте научи мене? **Ответ.** Призывание святыи есть во умножение славы истинного Бога, тем и не противно есть сей заповеди [Матф. глава 10; Дамаск. книга 4 глава 16; Иоан. глава 16; рим. глава 3]: зане же егда святыи молим о ходатайстве к Богу, первее, яко юже они благодать имут от Бога, сподобит и нас причаститися тоя, первее излиания ради честныи крове Христовы, потом и молитвы ради всех святыи.

Вопрос. Коя ради вины всех святых на помощь призываем? **Ответ.** Первее сего ради [Дамаск. книга 4 глава 16]: понеже мы сами грехов ради наших, не смеем к Богу просто приступати, того ради их предлагаем ходатаев, яко они уже суще в благодати Его неперменной помогают нам. второе, понеже они о нас молятся, яко за братию свою. третье, зане, якоже на небесех меншии ангели, чрез болшими приступают к Богу. тако и мы святыми, о милости и о благодати. молящися, яко чрез болших меншии, и яко чрез ближних далнии, к Богу приступаем [Дамаск. книга 4 глава 16; Дионис. о небесном священнонач. глава 15].

Вопрос. Научи мя от святаго писания о призывании святых. **Ответ.** Аще святии о мести на злых человек у Бога просят, якоже во Откровении Иоанна Богослова имам свидетельство сице глаголющо [Апок. глава 6; Дамаск. книга 4 глава 17; Мол. о погребеных], и возопиша гласом великим, глаголюще, доколе Владыко Святыи и истинныи не судиши, и не мстиши крови наша от живущих на земли, множае паче ходатайства их ради и молитвы к Богу приводим за себе.

Вопрос. Еда святии ведают о молитве и недостатках наших? **Ответ.** Души святых от мира сего отшедшыя по естеству своему, аще где немощей наших и неведуют: но обаче данною им от Бога благодатию, еюже и ангелом суть подобни, ведают о всех делех и недостатках наших, и молитвы, и милостыни, и инья добрыя дела наша пред престол Божии приносят, наипаче же аще в мире сем живуще, и многая препинания имуще, знали и ведали по благодати Божии еже кому что потребно бяше, множае паче ныне в болшей благодати суще и неперменной славе, знают недостатки наша: и о нас Господу Богу яко вернии Его слуги, и ближнии друзи, ходатайствуют: якоже о сем пространнеише в великом Катихизме обрящеши.

Вопрос. Которая есть вторая заповедь? **Ответ.** Не сотвори себе кумира, и всякого подобия, еже на небеси горе, и елико на земли низу, и елико в водах и под землю, дая не поклониши им, ни да послужиши им: аз бо есмь Господь Бог твой. Бог ревнив. отдая грехи отец на чада, до третияго и до четвертаго рода, ненавидящим Мене, творя же милость в тысящах любящим Мя, и снабдящим заповеди Моя.

Вопрос. Како имам разумети о сей заповеди? **Ответ.** В сей заповеди заповеда Господь Бог, оных кумиров имже погани честь и славу Божию отдавали, не творити: иже быша лестнии и лживии бози, понеже вовремя оно жидове уклонны были ко идолослужению.

Вопрос. Како имам разумети о иконах ихже имеет православная церковь? **Ответ.** Образы не суть кумири лестных и лживых богов, но суть воображением Спасителя нашего Исуса Христа, истиннаго Бога, по восприятому человеку естеству. такоже и пречистыя Девы Богородицы. и всех святых [Дамаск. мол. 1, 2, 3; Нис. мол. 2 слово 2; Васил. слово 18 ко Амфилох. о Св. Дусе; Евсев. книга 1 церковник]. и якоже в ветхом законе херувими иже в храме Господни, не быша запрещены, понеже не быша они противны к воли и славе Божии, сице и образы, яже имеет церковь православная, не суть противны сей заповеди. все бо то яже во евангелии и во иных писаниих святых описано есть, и Божиих избранных слуг, и возлюбленных Его друзей, нам к славе Его вообразено, яко да добродетели их и благочестие наследовати потщимся.

Вопрос. Како имам разумети о телесех святых и о мощех? **Ответ.** Телеса святых при животе их полны благодати и дара Святаго Духа были, тем и по смерти в том же теле их Господь Бог прославляемь и величаемь сыи, великая и неизреченная чюдеса творит [Дамаск. книга 4 глава 16]: дивен бо есть во святых своих [псалом 67]. аще же кто не верует, да идет и познает идеже суть мощи святых. а наипаче невидимый враг в господствующиих познавает, и боится их.

Вопрос. Которая есть третья заповедь? **Ответ.** Не приемли имени Господа Бога твоего всуе [Исход 20], не очистит бо Господь прилагающих имя Его туне.

Вопрос. Како имам разумети о сей заповеди? **Ответ.** Первое имаши от сея заповеди научитися, не приимати имени Господа Бога твоего всуе: рекше, на ложная прекословия еже бы друга лжею препирати, и на клятвы и неправды: понеже то не без мести Божия над тобою будет. второе не обращати имени Божия на кощунны и смехи [псалом 71], но егда и случится

Господа Бога вспомянути, с честью и благоговением, яко Господа и Творца своего вспомяни. потом всякое обещание еже кто Господу Богу обещавает, всячески то исполняти, лучше бо есть не обещати Господу Богу, нежели обещався солгати пред Ним [псалом 75]. к сему не точию той преступает сию заповедь иже кленется, но и той иже не по вине кого к клятве приводит. zde же разумеется имать и о сих, иже на святом крещении обещанную веру православно кафолическую отлагают, мирскаго ради суетия: понеже месть Божия над ними, и над домом их, в мире сем пребывает временно, в будущем же вечно пребывать имать.

Вопрос. Которая есть четвертая заповедь? **Ответ.** Помни день субботный святити его [Исход 20]: шесть дней делай, и сотвориши в них вся дела твоя. а день седмий субота Господу Богу твоему: да не сотвориши всего дела вонь, ты и сын твой, и дщи твоя, раб твой и раба твоя, вол твой и осля твое, и весь скот твой, и пришлец твой обитаяи у тебе: зане в шестих днях сотвори Господь небо и землю, море и вся яже в них. и почи в день седмий, сего ради благослови Господь день седмий, и освяти его.

Вопрос. Чего имам научиться от сея заповеди? **Ответ.** Первее научишися сему, яко вся тья дни в них же Господь Бог, особная благодеяния человеческому роду показа, тако чтитися и воспоминается достойны суть, яко вся наша прочая забавления оставити, во едином же точию прославлении и благодарении Господа Бога, той день бьяше суббота в ветхом законе, образом покоя Божия. в новой же благодати наступил день неделный, образом искупления обновления из мертвых воскресения Сына Божия, иже ни на едином ином имать быти изнурен, точию во единой славе Божии, и в воспоминании благодеяния Его. тожде имаша разумети и о прочих праздниках Господских, в них же особная благодеяния воспоминаются, а заповеданием церковным празднуемы.

Вопрос. Которая есть пятая заповедь, а первая другия скрижали? **Ответ.** Чти отца твоего, и мать твою, да благо ти будет, и будещи долголетен на земли блазе, юже Господь Бог даст тебе.

Вопрос. Како имам разумети сию заповедь? **Ответ.** Та заповедь первая есть межю теми, яже к ближнему сприплетаются. межю же ближними к любви и чести первыми суть родители, тем заповелевает Господь Бог, яко да в пристойной чести и любви оных имеем, понеже по Господе Бозе наибольшее от них благодеяние имеем. к сему под именем родителей заключаются вся благодатели наши, якови суть учителя, господие. начальствующие в чинех. и иже яковым любо образом благое нам творящи, по апостола Павла учению [рим. глава 13]: всяка душа властелем предержащим да повинуется: несть бо власть аще не от Бога.

Вопрос. Которая есть шестая заповедь? **Ответ.** Не убий.

Вопрос. Како имам разумети сию заповедь? **Ответ.** Та заповедь заповедует всякого убийства не творити, которое любо есть не по праву. потом всякого соблазна, имже убийство бывает, не точию в теле, но и в души. а егда судии по праву наказание творят, тогда в том греха не имеют, но правде умножение творят.

Вопрос. Которая есть седмая заповедь? **Ответ.** Не прелюбодей.

Вопрос. Како имам разумети сию заповедь? **Ответ.** Та заповедь научает, дабы человеци от прелюбодеяния соблюдалися: а Христос еще и совершеннее заповеда, и зрением с похотию не прелюбодействовати. другое же прелюбодейство есть душевное, имже согрешают иже от веры отступают православно соборныя восточныя. такоже и тии прелюбодействуют иже обещавшеся Господу Богу в законе иноческом жити в чистоте, убожестве, и послушании, егда то обещание свое преступают.

Вопрос. Которая есть осмая заповедь? **Ответ.** Не укради.

Вопрос. Чего имам научиться в сей заповеди? **Ответ.** Научишися ни единыя вещи чюжия привлачити си, яковым любо образом, аще в тай или яве, или убо прелестию яковою ближняго, в чинех же и службах: понеже то все заповедано есть от Господа в сей заповеди. якоже и святый апостол Павел о сем ясно воображает сиче, глаголя [1 кор. глава 6]: не льстите себе, ни блудницы, ни идолослужители, ни прелюбодеи, ни сквернителе, ни малакия, ни мужеложницы, ни лихоимци. ни татие, ни пианици, ни досадители. ни хищници, царствия Божия не наследят. zde же имут разумеется и резоимци [лихварии].

Вопрос. Которая есть девятая заповедь? **Ответ.** Не послушествуй на друга своего свидетельства ложна.

Вопрос. Чего имам научиться от сея заповеди? **Ответ.** Свидетельства ни на коже умышленного должны есмы глаголати, то бо все противно есть Богу и ближнему: такоже не должны есмы и на злейшаго врага нашего в судах свидетельства ложнаго приимати, или издавати. понеже не должны есмы творити злаго вместо добраго.

Вопрос. Которая есть десятая заповедь? **Ответ.** Не вожделееши жены ближняго своего. не вожделееши дому ближняго своего: ни села его, ни отрока его, ни отроковицы его ни вола его, ни осляте его, ни всякого скота его, ниже елика суть ближняго твоего.

Вопрос. Како имам разумети сию заповедь? **Ответ.** Та заповедь есть совершеннейшая, юже и Христос предложи, егда не точию в самом деле, но и от мысли искореняя заповеда, ни единой вещи ближняго не пожелати. и аще кто сице сохранит воистину таковыи с ближним в любви живет. в будущем же веце со всеми святыми царство небесное получит; аминь.

**Святаго Генадия, патриарха Константинопольскаго. О вере:
еже убо православную веру имети, основание добрых дел есть. темже от
веры начнется слово.**

Глава 1.

Веруй во Отца, и Сына, и Святаго Духа, Троицу неразделну, и неслиянну, единобожественну. Отца нерожденна. Сына же рожденна, а не созданна. Духа Святаго нерожденна несозданна, но исходяща. Три в единой воли, и едину славу, едину честь, едино поклонение, от всея твари, от ангел, и от человек приемлющу, превечну, и безконечну, пребывающую вовеки.

Глава 2.

Воплощенна же Сына Божия веруй истинносущна, а не привидением во две естестве Божество и человечество. Бога по Божеству, и человека по вочеловечению, и во обоем совершенна.

Глава 3.

Рождшую Его мать, Богородицу нарицай, девицу сущу и мать, веруй яко роди Христа и воздои. деву же яко девою пребысть, и по рожестве пребывает.

Глава 4.

Кресту Христову с верою поклоняйся, яко на том спасение всем человеком содела Господь.

Глава 5.

Иконе же Христове, и пречистыя матери Его, и всех святых Его честь с верою воздавай, яко к самым любовно глаголи в молитве. веден бысть на жертву Христос яко агнец незлобив Еммануил, на закление волное. приидите воспойте, и поклонитесь на кресте повешенному животу безконечному.

Глава 6.

Святых же всех угождших Господу, моли, яко помощники суция и заступники, притекающими к ним, понеже прияша дерзновение к Богу яко угоднии раби к своему Господину.

Глава 7.

Мощи же святых с верою целуй, и честь воздавай им яко честным, понеже Христа ради пострадаша.

Глава 8.

Тайнам Божиим веруй, телу и крови Христове и причащайся со страхом, да причастник будеши царствию Его небесному.

Глава 9.

Неверство же отмай, и не рцы како хлеб, тело: и вино, кровь. но слыши, яко невозможна ничтоже от человек от Бога же вся возможна.

Глава 10.

Веруй воскресению мертвых, и жизни будущего века, по неизреченному словеси Господню, еже в евангельском писании слышиши учение.

Глава 11.

Помни суд, чай ответа, и воздаяния по делом, веруй яко будет, и будет.

Глава 12.

Посем же возлюби Господа Бога твоего от всея души твоея и крепости, и подвигни вся твоя дела и прочая нравы к Того угождению.

Глава 13.

Паки возлюби искренняго своего, с Ним же в единой купели породися, сиречь, всякаго христианина, паче же брата. рече бо Господь, яко восхожду ко Отцу Моему, и Отцу вашему.

Глава 14.

Страх Божии выну в сердца имей, и памятуй яко ту сущу Богу с тобою и на всяком месте, где идеши или седиши.

Глава 15.

Страхом Его, яко уздою обрати ум свой, и истязайся по вся часы, еда без востягновения ходяи пустошных научишися.

Глава 16.

Поклоняй главу свою всякому старейшему тебе, смиренным разумом, смиренныя воздвигнеши.

Глава 17.

Други своя равныя тебе с любовию усретай, и с обнятием целование дай им, яко Елисавету Марии.

Глава 18.

Меншия тебе и малыя верстою, любовию восприимай и помилуй, и к Богу воздохни о них, яко новоначенших их познати Бога.

Глава 19.

Царя бойся всею силою своею, не есть бо страх его на пагубу души, но паче научишися от того, боятися Бога.

Глава 20.

Небрежение бо о властелех, небрежение о самом Бозе, еже на власть земную учиненнаго. видимаго бо владыки не боятися, како может боятися невидимаго Бога.

Глава 21.

Боятися ученик учителя жезла, паче же самого учителя. такожде бояися царя, боится и Бога, имже казнятся согрешающии. царь бо есть Божии слуга, человеком милостию и казнию.

Глава 22.

Посем всякому богатому главу свою поклоняй смирения ради. древо бо многоветвенно подклонением подойдеши, и мимо идеши.

Глава 23.

Приемляи бо власть от царя своего, от подруг своих славы требует, а от менших поклонения просит.

Глава 24.

Простейшаго во всем ищи, и в брашне и во одежди. не стыдися нищетою, ибо большая часть мира сего в нищете ходит.

Глава 25.

И не рцы богата мужа сын есмь срам ми есть, никтоже бо богатейша Христа Отца твоего небеснаго, родившаго тя во святой купели, и в нищете ходившаго, не имуща где главы подклонити.

Глава 26.

Правдою украшайся, ко всякому тщию истинное отвещати, и не мози устыдетися лица, и лжи послух быти.

Глава 27.

Пред царем бойся лжю глаголати, ибо погубит Господь глаголющия лжю. но с покорением отвещай ему, яко самому Богу.

Глава 28.

Аще бо вовремя неистинно что возглаголеши, а тебе не сведущу. Бога бойся, еда не искушает тя: блюдеши ли своя душа, аще явишися неистинствуяи, и не можеши уверитися ему, яко блюдеши онаго души.

Глава 29.

Аще право изглаголеши, и впадеш в гнев от кого любо, не скорби о том: но паче утешайся реченным от Господа: блажени изгнани правды ради, яко тех есть царство небесное.

Глава 30.

Кроток буди ко всякому человеку, и к старейшим тебе и к меньшим. лицемерная бо кротость, еже болших устыжати, меньших же озлобляти.

Глава 31.

Кротко ступание, кротко седание, кроток взор, кротко слово, вся сия тебе да будут, от сих бо истиннии христианин явишися.

Глава 32.

Кротость же еже недосадити никомуже, ни в словеси, ни в деле, ни в повелении, но всякому человеку нравы своими сладит сердце.

Глава 33.

Ум свой присно от суетных мыслей встягай, и воспущай горе к Богу, сим бо на стязю подвига уступаеши, душу же из расслабления свобождаеши.

Глава 34.

Не есть дивно низпадати человеческому естеству к земным, но еже падши не встати. кто бо заблудит от пути, не ищет ли его? расслаблен ли есть отчаянием день, утрешний день, подвига отдаждь.

Глава 35.

Славы земная, ни в коем же деле похощи. слава бо земная угасает любящим ю, возвевши вовремя человеку яко буря ветреная, плод добрых дел его отъемши, вскоре отшедши посмеется неразумию его.

Глава 36.

Неразумие бо есть приходящим благостыням вечным, даром благаго Бога, еже непождати терпением и верою, но о земных обрадоватися, и тех прияти аки неверующему воскресению.

Глава 37.

Аще бы слава всего мира приблизилася славе небесней, не быша сынове мира сего распяли Господа славы. кии бо раб дерзнет в том дому обитати, идеже господина его не прияша.

Глава 38.

Бесчестие любви, аки чашю пельню приими. аще бо пространно ти есть, но на прогнание греховнаго недуга, грех убо сладостию внидет, горестию же изыдет.

Глава 39.

Желая вечныя радости, худе земным причащается, выну мысля о исходе своем. не стужает ему человеческое поношение, яко Господь пришед в мир, и сей претерпе бесчестие от раба своего.

Глава 40.

Иже хочет славен быти в сем мире, той безчестия не терпит, веру же держай безславию любит. помышляй реченное от Господа, како может веровати, славу от человек приемляи, славы же не искии от едиороднаго.

Глава 41.

Алчбу и жажду, Христа ради люби, и елико пакость телу твориши, души благодать твориши, воздаяния бо суть противу делом, воздаст паки благая за мало, егоже ради потерпим с радостию.

Глава 42.

С мучеными Христа ради хоти ликовствовати. предай же тело на пост, и волю на поправление, утробу на алчбу, сердце на крепость, кровь на пролитие изверзи. аще не вне, то внутрь изсуши ю сухотою яди, яко да примемши обещанная благая.

Глава 43.

Веси, яко призывающии царя очищают полаты, и ты аще хочещи желанием небеснаго Царя в дом свой прияти, света ради души твоея, очисти тело постом: истреби жажду: украси смирением: и накади благоуханною молитвою.

Глава 44.

Молитвы душевныя пиши не отлагай, якоже бо тужит тело пиши лишаемо, тако и душа молитвенныя пиши лишаема, к разслаблению, и умерщвлению умному приближается.

Глава 45.

Свет убо в храмине свеща, свет же в чувстве молитвенныи разум, ясен свет от свещи, не сущу вмесу никоемуже. светла же зело молитва непримесна мыслем земным.

Глава 46.

Храни свещю от ветра, молитву же от лености, украси ю яко невесту бдением, трудом, и терпением, да похощет ея Царь небесныи.

Глава 47.

Предай же хотение свое Богу ведущему вся, яже прежде бытия человеку, и не проси воли твоей быти, всякаго бо человека мысли неполезны, но глаголи к Богу да будет воля Твоя, Той бо творит вся на ползу нам, ихже мы плотнии не вемы.

Глава 48.

Востони аки мытарь: прибегни аки блудныи: умилися аки Ахав: прослезися яко блудница: зови яко хананея: предъстой яко вдовица: молися яко Езекиа: смириися яко Манасиа. аще тако молишися, примет благии Господь молитву твою, аки мати младенца.

Глава 49.

Тайно место обрет, и сед с тихостию, помяни си грехи, и отпадения царствия небеснаго, и умилися сердцем, и образом: и преклонши главу, рцы с стенанием, горе мне яко пришельствие мое удалися, да кто даст главе моей воду, и очима моима источник слез. увы мне яко близ день.

Глава 50.

Слез ли не имаши, не отчайся, воздыхай же часто и тяжко, от всего сердца. слезы бо суть Божии дар. и помалу воздыханием, и умилением, испросиши у Бога. писано бо есть: ищай обрящет. просяи приемлет: и толкующему отверзается.

Глава 51.

Обрет слезы храни я всею силою своею, от объядения, и пиянства, паче же от осуждения всякаго человека. своему бо делу зазираи, человека же егоже созда Бог, не суди.

Глава 52.

Неверуй ни своима очима, аще видиши согрешающа кого, яко и та неверна еста, первое бо в рай очи соблазниста, и падение нам от восора бысть.

Глава 53.

Безгрешнаго есть дело грехом судити. кто же без греха, разве един Бог, Той бо един не измерен, и Тому подобает судити сущым под мерою.

Глава 54.

Иже бо имеет на ребрах своих язву гноя, нечистотою чужею не гнушается: помышляя выну о множестве грехов своих, николиже о дружном соблазне беседу составити щощет.

Глава 55.

Еже судити человеку соблазвившуся, гордость есть и самомнение, Бог же гордым противится. а иже по вся часы ответ дати о своих гресех чает, не скоро главу возведет чужих соблазн смотрити.

Глава 56.

Не буди горд, да не похвалится гроб, твою гордость держай, и убогии почитет на гробе твоём до полудни. и никоего вреда примет.

Глава 57.

Червь смирен зело и худ, ты же славен и горд. но аще разумен еси, то сам уничижи гордость свою, помышляй я яко крепость твоя и силы, червем снедь будет.

Глава 58.

Помяни первыя прослывшыя во храбрстве, в богатстве же, и силе, и славе, яко безвести отпадоша, и без памяти быша. худии же и убозии в мире сем, о души своей подвигшиися, како на небесех прославлени, и на земли хвалимы, и на помощь призываемы.

Глава 59.

Видев мертвеца несомая аки свое естество помилуй, и последуй ему до гроба, двое бо благодеяние примешь онога ради смерти. свою кончину помянешь, и смиришися; и паки тело его помилував, гробу предай, и сам помилуван будешь.

Глава 60.

Болящаго посети, и неси ему егоже желает вкусити, сам же послужи ему, аки своему сроднику. ведый яко и ты имаши такожде пострадати.

Глава 61.

Стенящему иному тяжко от болезни, и ты жалостныя слезы испусти, и воздохни к Богу о обиде его, в ней же есть. аще врач прилучится, и ты даждь цену за исцеление его.

Глава 62.

Умирающу же ему: ты своими руками очи ему стисни и уста, и к Богу о души его всем сердцем помолися, и омый рукама своима. аще же убог есть, потщися не нага его погребсти.

Глава 63.

Дело бо спешно покаянию и слезам, пощение умирающих, кто бо тогда не приидет во умиление, видя естество свое во гроб входящее, и имя его угасше, славу же и богатство во тму сошедшу.

Глава 64.

Аще имаши дерзновение к царю и властием, поскорби о обидимом от силнаго. и до пота борони по сироте, да вменит Господь каплю пота твоего с кровию мученическою.

Глава 65.

Аще ли не знаем еси царем то к тем иже имут дерзновение к нему, потужи о убозем, и Господь равно первому се вменит.

Глава 66.

Приклони ухо твое к просящему, и обнищавшему в житии сем, исполни своим изъобилием онога недостаточную нищету.

Глава 67.

Возведи очи милостивно на сидящаго в наготы, и зимою трясущагося, понудися естество свое прикрыти, одежею лежащею у тебе, и Господь даст ти паки сторицею, и жизнь вечную.

Глава 68.

Прости руку скитающемуся по улицах и введи такового во обитель свою. общ ти буди с ним хлеб твой. обща чаша воды, или питие, еже ти Бог дал.

Глава 69.

Странна введи в дом, и безкровнаго, в под кров твой, даждь мокнущему сухоту: изъябшему теплоту: омыи скверну тела его яко убог есть, и достоин помилования.

Глава 70.

Посети сущих в темницах, по Господню повелению, виждь беды их и страсти, и воздохни о них, и рци ох мне; сии за едино согрешение страждут, аз же по вся часы Владыце моему Христу согрешаю и в легкоте пребываю.

Глава 71.

Аще видиши кого от них по оклеветанию страждуща, помози ему Христа ради, и яви истину к ним же оклеветан бысть, иного спасения несть ближша сущим у царя и у велмож, разве яже обидимыя избавляти.

Глава 72.

Сядящу ти над многоразличною трапезою, помяни сух хлеб ядущаго, и немогущаго воды принести недуга ради.

Глава 73.

Питай тело свое, даждь часть от трапезы твоя душе своей, яко та есть честнейши телесе. да душевную часть нищии сохранят, да егда востребуеши милости, и помощи Божия, готово обрящеши во время исхода.

Глава 74.

Насыщаяся многосластнаго пития, помяни нищаго теплу воду пьющаго, от солнца востопившуся, и туже прахом нападшу.

Глава 75.

В богатстве сыи и земных благ изьобилие имеяи, помяни выну слово Авраамле к богатому, восприял еси благая в животе своем, якоже и убогии злая: темже он веселится, ты же страждеши.

Глава 76.

Возлежашу ти на многомягцей постели, и пространно протягаяся. помяни на голей земли лежащаго под единым рубом. и не дерзающа прострети ногу своею, недуга ради и зимы.

Глава 77.

Лежашу ти в твердопокровенней храмине, и слышашу от шума дождевнаго множество гласа. помысли убогих како лежат ныне. дождевными каплями яко стрелами пронзаеми, а другия от неуснутия сядяща, водою же подъята.

Глава 78.

Сядящу ти в зиме, в теплей храмине, и без боязни изнажившуся, воздохни помыслив о нищих, како клячат над малым огнем трясущеся, и болшую беду очесем от дыма имуще, рuce токмо согревающе, плещи же и все тело мразом изьмерзше.

Глава 79.

Духовная гони, духовная и помышляй, а не земная. ведыи яко по нетленному одеянию крещения, вси равны суть убозии, и богатии. темже блюди, еда по земному помышляяи, убогаго тленною одежею, с тобою не равно одеянна презриши.

Глава 80.

Церкви Божией зовущей тя на молитву, остави дело земное кое любо буди, и иди на душевную пищу со тщанием яко Петр, и Иоанн, ко гробу Господню.

Глава 81.

Идущу ти во святыи храм, помысли, еда кого разгневал еси в коем любо деле, и всяко потщися гневный облак разгнати, да яко солнце освятит душу твою молитвенная доброта.

Глава 82.

Покрывает мрачный облак, солнечную доброту. и губит молитвенную красоту, помнение гнева.

Глава 83.

Вступив в двери церковныя, мыслию самая врата небесная пройди и всю годину тайныя службы со удивлением и со страхом стой. сматрай с верою бывающих, телесныма очима, и душевныма. сиче и сам применишия от земных мыслей на будущая.

Глава 84.

Видев честныя и освященныя дары в жертву Богу о всех приносимыя, воздев руке на небо рци благодарно с верою. Слава Твоему человеколюбному смотрению, Спасе всего мира Христе Боже.

Глава 85.

Размышляй по вся часы, частая согрешения своя, премногое же и безчисленное человеколюбие Божие, еже к человеческому роду имать, и до последняго издыхания ожидай покаяния.

Глава 86.

Темже предвари лице его исповеданием, прииди потщися, припади пред Господем, и восплачися пред сотворшим тя, зови милости Его, приглашай щедроты Его даже смерть не варит тебе.

Глава 87.

Не рцы много согреших, и много беззаконовах, не имам дерзновения еже к Богу припасти, не отчаявайся, не прилагай ктому отседе согрешений, и помощь Всемилостиваго не посрамлен будеши.

Глава 88.

Не ложь бо рекии: грядущаго ко Мне не иждену вон, и по сих всех: обратитесь рече ко мне, и исцелю вы, яко не хошу смерти грешнику. темже дерзай и веруй яко чист сын, и приближающагося к нему очистит.

Глава 89.

Аще истинно покаяние хоцещи прияти то яви е делом, аще о гордости каешися, покажи смирение: аще ли пианства, покажи пост: аще любодеяния, покажи чистоту. уклонибося рече от зла, и сотвори благо.

Глава 90.

Токмо не косни в тине греховней, да внезапу погрязновение приимеши, воздохнеши бо, и не будет послушающаго, егда ангел Господень станет пред очима твоима, врази же твои яко облаци покрывают тя.

Глава 91.

Внемли души своей, яко едина ти есть, и едино время живота, не ведом конец, и непроходима пучина воздуха, и враг твоих исполнена, несть бо помогающаго, разве добрых дел, темже всею силою своею взыщи сих.

Глава 92.

Вступи на добродетельныя стези, и поиди скоро, даже вечер не постигнет, потщися ко вратом вышняго града, не уклоняйся, ни на десно, ни на шуюе. да не заблудиши в пропасть мучения.

Глава 93.

Епископом Пастырем Христова стада, словесных овец, главу свою поклоняй, со всяким благоговением, и дастьтися благословение Божие.

Глава 94.

Презвитеры, иереи Христовы, предстатели тайней Его трапезе, всякою честью почти и любовно их, заповедей Христовых учащих, послушай.

Глава 95.

Такожде диаконом подьяконом, и четцем, яко служителем Божиим, честь подобающую воздавай, и тщися ни единаго их оскорбити.

Глава 96.

Аще убо стоящих пред земным царем со страхом чтиши бояся, ниже словом пререкаючи им. како убо разумееши о слугах небснаго Царя.

Глава 97.

Монастыри, и дома святых посещай, виждь житие, чин, и строение их, и видеви пребывание их, окаеши житие свое, и управишися оттоле.

Глава 98.

К сущым же в горах не ленися ити, взыщи благословения и молитвы. аще что имаши телесныя потребы, донеси им, и приимеши душевную пользу.

Глава 99

Паче же всякаго мниха не тщися без поклонения минути. аще бо знаемым токмо поклоняешися и чтиши, то по содружению есть, а не по чести образа сущаго на них.

Глава 100.

Конец же всем реченным.

Возлюби Господа от вся души, и страх Его да пребудет в сердцы твоём, праведен буди и истинен, покорлив, долу понича. ум же к небеси простирая, умиление к Богу, и к человеку имея, печалнаго утешитель, терпелив в напасти, и не досадитель, щедр, и милостив. нищым кормитель, странноприемник. скорбен грех ради, весел о Бозе. алчен буди и жажден, кроток, приветлив, не славохотен, не златолюбец, друголюбец, не лицемерен, не горделив, подвижник к Богу. во ответех сладок, частомолитвеник, разумен, не осудник всякому человеку, поборник по всех обидимых. и будеши чадо евангелия, сын воскресения, наследник жизни. о Христе Исусе Господе нашем, Ему же слава и держава, честь и поклоняние, со Отцем и с Пресвятым Духом, и ныне и присно и вовеки веком аминь.